


廿二史攷異

六







廿二史攷異

(六)

錢大昕撰

廿二史考異卷三十三

隋書一

高祖紀上

漢太尉震八代孫鉉。北史代作世案。隋史成於唐太宗時。其時不避世字。如王世積、陰世師、馮世基、薛世雄、虞世基諸人。傳皆未回避。此紀風骨不似代間人。代稱純孝。彰不代之業。精采不代。周輔乃宏道于代。代俗之徒。德爲代範。與代推移。行歌避代。皆唐人追改。而風流映世。世子、世孫、世祿、世人。及韋世康、王世積、虞世基之類。仍用本文者。蓋唐以後人。又據它書回改。而改之復不能盡也。民部尙書之民不諱。而啓民可汗則改爲啓人。賀若弼、柳賚、薛世雄、突厥諸傳仍稱啓民。皆因校書者展轉改易。非史家之例不一也。方置文深之柱。非止尉佗之拜。此用馬援銅柱事。援字文淵。避諱改爲深字。

開皇元年三月。和州刺史、新義縣公韓擒虎。本文不當有虎字。蓋後人增入。毛本無虎字是也。仁壽三年詔云。風雲之從龍虎。亦當是武字。皆後人所改。

高祖紀下

十九年四月。突厥利可汗內附。十月。以突厥利可汗爲啓人可汗。利可汗當作突利可汗。史脫突字。啓

人。煬帝紀作啓民。突厥傳及它傳亦多作啓民者。

煬帝紀下

大業九年十月。改博陵爲高陽郡。地理志失載。

禮儀志四

後周保定三年。陳養老之禮。以太傅燕國公子謹爲三老。有司具禮擇日。高祖幸太學以食之。事見謹傳。案。五代志旣編入隋書。與周史各自爲部。當云事見周書于謹傳。於例乃合。否則似隋書有謹傳矣。

音樂志上

中庸表記。坊記。緇衣。皆取子思子。案。緇衣。或云公孫尼子所作。考。文選注引子思子云。民以君爲心。君以民爲體。又引子思子云。詩云。昔吾有先正。其言明且清。今其文皆在緇衣篇。則緇衣爲子思子之言信矣。坊記一篇。引春秋者三。引論語者一。春秋。孔子所作。不應孔子自引。而論語乃孔子歿後諸弟子所記錄。更非孔子所及見。竊意表記。坊記二篇。所稱子言之。子曰者。皆子思子之言也。

音樂志中

故曹妙達。安未弱。安馬駒之徒。至有封王開府者。安未弱。北史恩幸傳作何朱弱。

音樂志下

其歌曲有陽伴。陽伴卽所謂楊叛兒也。

律麻志上

圓周盈數二丈一尺四寸一分五釐九毫二秒七忽。二丈當作三丈。

銘八十二字。今數之止八十字。

王顯達獻古銅權一枚。上銘八十一字。案黃帝初祖以下凡七十九字。并律權石重四鈞六字計之。則爲八十五字矣。

律麻志中

中左兩晉迭有增損。中左謂中原江左也。然割裂不成文。

律麻志下

朔晨百三半。晨當作辰。今人所謂時也。以十二除朔日法得之。氣朔日法各不同。故朔辰與氣辰數亦異。要皆十二分日法之一也。

日限十一。當作十二。考李淳風甲子元術推日躔卽寫焯法。其云進綱者卽盈汛也。云退紀者卽虧總也。而皆以十二乘之。知此文日限當爲十二矣。

就徑求望者。加日十四。餘九百五十半。下弦加日二十二。餘百八十四。餘九百五十半。下弦加五十九。

當云下弦加日二十二餘百八十三太句四餘九以下皆衍文也五十九之數於義無當或當云求後月朔加日二十九餘六百五十九

分餘滿法從日度一句百度有所滿則從去之百當作日

毛本作日

度準三百四十八四當作三度準者歲率之半也

又準度乘朔餘加之準度當作度準

又十二乘辰餘四爲小太亦曰少五爲半少六爲半七爲半太八爲大少亦曰太九爲太此太字當作大十爲大

太十一爲窮辰少辰餘之下當有一二三之名不應便從四起蓋脫文也凡以十二乘者即以十二爲法母十二之三即四分之一也故爲少而二爲小少四爲小太矣十二之六即四分之二也故爲半而五爲半少七爲半太矣十二之九即四分之三也故爲大而八爲大少十爲大太矣十一爲窮辰少則一爲沾辰太矣後世有士元當援吾言以補之

每加日十五餘萬一百九十秒三十七此二十四氣恆日及餘也置歲數以二十四約之又以氣日法收之得十五日萬一百九十二分又四十八分之三十七也當云餘萬一百九十二脫二字

小寒節陽五十三當云陟四十三

交月二千七百二十九率四百六十五以交率除交月得五月四百六十五之四百有四而一食也古

法五月二十三之二十而一食。三統四分同與此率相課則萬六百九十五月之中古法得九千三百食皇

極得九千二百九十二食視古率微弱。

交復日二十七餘二百六十三秒三千四百三十五交日十三餘七百五十三秒四千六百七十九。史

失載秒法之數今以意補之蓋倍交日之秒數。九千三百五十八減交復日之秒數其餘數五千九百二十三

是爲秒法也。

交限日十三餘三百五十五秒四百七十三半。三百當爲五百據下文入交二日餘百九十八以下入

交十三日餘五百五十五以上皆爲食限以五百五十五減朔日法。一千二百四十二餘六百八十七并交日

餘七百五十三爲一千四百四十滿日法爲一日餘百九十八與前限相等是爲交前交後之食限。

五行志下

周大象二年尉迴敗於相州。卽尉遲迴也。魏書官氏志尉遲氏後改爲尉氏。宇文當國凡代北姓皆令

復舊故迴仍稱尉遲氏而當時猶有尉迴之稱。楊義臣本姓尉遲氏而詔稱尉義臣。鮑宏傳亦云尉義

臣。

神武行殿中將軍曹魏諫曰。北史神武紀作曹魏祖。此脫祖字。

百官志中

周太祖命尙書令盧辯制六官。以魏恭帝三年始命行之。所設官名。訖於周末。多所改更。竝見盧傳。不復重序云。案周書載官制名號。命數于盧辯傳。以本書無志。故存其事於傳中也。及長孫无忌等承詔。爲五代志。事從其類。宜改入百官志。不當闕其文。而取徵于列傳矣。其後五代志編入隋書。此語猶仍不改。書別兩朝。文取互見。揆之體裁。詎爲允當。且周末改更之制。傳未悉載。不得云竝見盧傳也。

百官志下

上中州減上州吏屬十二人。王懋竑曰。隋文帝父名忠。并中字亦諱之。侍中改爲納言。中書省改爲內史。殿中改爲殿內。中舍人。中常侍。中謁者。俱改爲內。皆其顯然可考者。而上中州。中上州。中中州。中下州之類。仍作中。此必非當時本文。或史官以其不辭而改之也。

地理志上

天監十年。有州二十三。謂揚、南徐、荆、江、雍、郢、南兗、湘、豫、司、北兗、北徐、青、梁、益、交、廣、南梁、寧、衡、桂、越、霍也。安定郡。舊置荊州。案後周嘗置總管府。志失書。

上郡內部縣。舊置敷州及內部郡。內部本中部。避隋諱改。

朔方郡長澤縣。西魏置闡熙郡。又有後魏太安郡。及置長州。案周本紀。魏廢帝三年。改南夏爲長州。是

後魏置南夏州于此。西魏改爲長州也。志有脫誤。

天水郡上邽縣。故曰上邽。大業初改名。當云故曰上封。魏志：天水郡有上封縣。犯太祖諱。蓋上邽本漢舊縣。後魏避道武嫌名。改爲上封。至大業初。復稱上邽也。

隴西郡隴西縣。舊城內陶。城當作曰內陶。本中陶。避諱改。

枹罕郡。舊置河州。案：後周保定四年。置總管府于河州。五年。廢河州總管。改置總管于洮州。俄廢。仍遷總管府于河州。見周書李賢傳。

武威郡昌松縣。後魏置昌松郡。後周廢郡。以榆次縣入。榆次當作摺次。因并州有榆次縣。相涉而誤。敦煌郡常樂縣。後魏置常樂郡。後周併涼興。大至。冥安。閭泉合爲涼興縣。大至卽廣至。避隋煬帝諱。以廣爲大也。冥安當作宜安。閭泉蓋卽淵泉。史家避唐諱改之。

漢川郡。舊置梁州。此晉宋以來之梁州也。梁天監三年。夏侯道遷叛入于魏。大同元年。仍爲梁。有梁末。又入西魏。

西城郡。梁置梁州。尋改曰南梁州。案：天監初。失漢中。因移梁州于西城。大同初。梁州復治漢中。而西城。遂有南梁之稱。

房陵郡。西魏置光遷國。後周國廢。光遷國未詳何人所封。

河池郡。後魏置南岐州。後周改曰鳳州。案：周書：魏廢帝三年。改南岐爲鳳州。是時周未受禪也。後周當

作西魏。

順政郡。後魏置東益州。梁爲武興蕃王國。武興卽仇池氏楊氏所據。

義城郡。後魏立益州。世號小益州。梁曰黎州。西魏復曰益州。又改曰利州。案。周書。魏廢帝三年。改西益

爲利州。是西魏以此益州爲西益州也。

金山郡。西魏置潼州。案。梁書。武陵王紀傳。太清五年。西魏將尉遲迴帥衆逼涪水。潼州刺史楊乾運以

城降之。則梁時已有潼州。不始于西魏也。

巴西郡。梁置南梁北巴州。此條似有脫文。當云梁置南梁州。後改爲北巴州也。考。天監八年。以北巴西

郡置南梁州。見梁書本紀。其改名北巴。則史未詳其年。當是大同初。復收漢中之後。以西城爲南梁。因

改此州爲北巴耳。志于普安郡下。又云梁置南梁州。後改爲安州。此則莫能詳其建置之本末矣。

閬內縣。本閬中。隋避諱改。

梁置北巴郡。當依梁書作北巴西。

巴郡。梁置楚州。案。梁置楚州于淮南之楚城。而巴郡又立楚州。是同時有二楚州。

隆山郡。西魏置陵州。西魏當作後周。

資陽郡。西魏置資州。西魏當作後周。考。周書。閔帝紀。元年正月。于劍南陵并置陵州。武康郡置資州。遂

寧郡置遂州。志于遂州書。後周置陵賚二州。書西魏置。蓋考之未審也。武康郡名志亦失書。越巂郡。後周置巖州。開皇六年改爲西寧州。案周書本紀天和五年大將軍鄭恪率師平越巂。置西寧州。則西寧州乃後周所置。非始于隋也。

地理志中

河南郡陝縣。後魏置。及置陝州恆農郡。案後周嘗于陝州置總管府。志失書。

陸渾縣。東魏置伊川郡。領南陸渾縣。開皇初郡廢。改縣曰伏流。大業初改曰陸渾。又有東魏北荊州。後周

改曰和州。開皇初又改曰伊州。案魏志北荊州領伊陽、新城、汝北三郡。伊陽郡領南陸渾一縣。與此

志正合。惟伊陽伊川郡名小異爾。周本紀保定二年于伏流城置和州。可證後周之和州在陸渾。不在

襄城也。而志于襄城郡。又云東魏置北荊州。後周改曰和州。開皇初改爲伊州。未免複而舛矣。

濟陰郡。後魏置西兗州。案魏初置兗州于滑臺。其後青兗內附。因稱滑臺爲西兗。太和中始罷。此濟陰

之西兗州。乃孝昌中所置也。

襄城郡郟城縣。舊曰龍山。東魏置順陽郡。及南陽郡南陽縣。此廣州僑置之順陽。南陽。非荊州之順陽。

南陽也。

汝南縣。有後魏汝南郡及符壘縣。竝後齊廢。此僑置之汝南。魏志廣州有汝南郡。永安元年置。治符壘

城卽此。

魯縣。後魏置荊州。尋廢立魯陽郡。後置魯州。案魯陽之置荊州。在太和十八年。至二十二年。移荊州于

穰城。而以魯陽爲郡。永安中。置廣州于魯陽。而齊周因之。史未見魯州之名。當爲廣州之誤也。

潁川郡葉縣。又東魏置定南郡。後周廢爲定南縣。大業初省入。案魏志襄州有南安郡。領安南、南舞、葉、

南定四縣。太和中。嘗置郢州于此。疑卽此。志所謂定南郡。而二史郡名互異。未知其審。

汝南郡真陽縣。舊置郢州。東魏廢州。置義陽郡。案魏以梁之司州爲郢州。治義陽。孝昌末。郢州復入于

梁。乃僑立郢州于此。天平中罷州。仍立義陽郡。以撫其遺民。故真陽亦有義陽郡。

新蔡縣。東魏置終蔡州。終字衍。

淮陽郡項城縣。東魏置揚州。及丹楊郡秣陵縣。梁改曰殷州。東魏又改曰北揚州。案此條東魏字兩見。

疑上東字當爲後字之誤。魏志北揚州。天平二年置治項城。不言嘗置揚州。

恆農郡盧氏縣。後魏置漢安郡。西魏置義州郡。開皇初郡廢。州改爲虢州。志云州改。而不言何時置州。

蓋有脫文。考權景宣傳。郭賢從王思政鎮恆農。授使持節。行義州事。當州大都督。此義州當卽治義川

郡。

浙陽郡。西魏置浙州。案魏志有析州。卽此浙州也。魏書以關西爲僞。西魏所置州郡。皆棄而不書。析州

之名既見于魏收書，則不始于西魏矣。

南陽郡舊置荊州。案南郡亦云舊置荊州。南陽之荊州，後魏之荊州也。南郡之荊州，晉宋齊梁之荊州也。

淮安郡比陽縣，又有後魏城陽縣，置殷州城陽郡。案魏志未見殷州之名，惟郢州領安陽、城陽、汝南三

郡，或疑卽此殷州。然志于此縣下，又云又有比陽故縣，置西郢州。西魏改爲鴻州，則西郢與殷州又似各別。魏收志有南郢，而無西郢，是一是二，不可考矣。

慈邱縣，後魏曰江夏，并置江夏郡。案魏志南郢州有江夏郡，領屈陽、郢陽二縣，而無江夏縣，未知卽此否。

東平郡雷澤縣，舊曰城陽，城當爲成。

勃海郡滴河縣，滴當作滴，讀如商。

清河郡漳南縣，有後魏故素盧城，素當作索。

清泉縣，本清淵，史家避唐諱，追改。

汲郡汲縣，東魏僑置七郡十八縣，後齊省以置伍城郡。魏志興和二年置義州，寄治汲郡陳城，領五城、秦寧、新安、澠池、恆農、宜陽、金門七郡，與此志合。伍城卽五城也。

黎陽縣。後魏置黎陽郡。後置黎州。案周書武帝紀。宣政元年。分相州黎陽郡置黎州。則黎州乃周所置。魏世無此州也。當云後周置黎州。脫周字。

長平郡丹川縣。舊曰高都。後齊置長平。高都二郡。案魏志。長平。高都二郡。魏永安中置。非始于後齊。

上黨郡鄉縣。有後魏南垣州。尋改豐州。後周廢。此州不見于魏收志。或是西魏所置。

絳郡稷山縣。又有後周勳州。置總管。後改曰絳州。勳州卽玉壁城。

文城郡昌寧縣。後魏置。并內陽郡。案魏志。南汾州中陽郡有昌寧縣。隋人避諱。改中爲內。

馬邑郡雲內縣。後魏立平齊郡。尋廢。案平齊郡。皇興初置。領懷寧。歸安二縣。其廢當在遷洛之後。

樓煩郡秀容縣。舊置泗州。泗當作肆。

襄國郡鉅鹿縣。開皇六年。置南蠻縣。蠻當作蠻。

趙郡廩陶縣。舊曰廩遙。開皇六年。改爲陶。案廩陶本漢舊縣。後魏永安二年。分廩陶置廩遙縣。治楊城。

其廩陶故縣。不見于隋志。蓋廢于齊周之世矣。隋改遙爲陶。雖取故名。其實非一地。

河間郡。舊置羸州。羸當作瀛。

文安縣。有狐狸液。液當作淀。

清苑縣。舊曰樂鄉。後齊省樊輿。當作北新城。清苑。樂鄉入永寧。改名焉。開皇十八年。改爲清苑。案清苑。

縣魏太和元年分新城置即北後齊與新城樂鄉俱省入永寧又即永寧故城而更其名曰樂鄉隋開皇中又改名清苑實即後魏之永寧城也。魏志謂太和中改樊輿爲扶輿。此志仍作樊輿。與魏志亦不合。

上谷郡遂城縣。後魏置南營州。淮營州置五郡十都。此八字有譌脫屬建德郡。襄平、新昌屬遼東郡。永樂屬樂浪郡。富平、帶方、永安屬營邱郡。今考魏志當云置南營州及五郡十一縣。龍城、廣興、定荒屬昌黎郡。石城、廣都屬建德郡。此志蓋脫十五字。又譌四字也。襄平以下與魏志同。但魏志襄平作太平。似當從此志。

後齊唯畱黎一郡。當云昌黎。脫昌字。

地理志下

彭城郡符離縣。有竹邑縣。梁置睢州。案梁之睢州治竹邑城。東魏之睢州治取慮城。隋爲夏邱縣地。有女山、定陶山。案晉宋之際僑置南濟陰郡及定陶縣于此。山蓋以縣得名。

魯郡博城縣。舊置泰山郡。後齊改郡曰東平。開皇初郡廢。大業初州廢。案志云州廢。不云何時置州。蓋有脫文。以王劭舍利感應記證之。當置泰州于此。

琅邪郡。舊置北徐州。案梁之北徐州治鍾離。此則後魏所置。魏志北徐州、永安二年置。領東泰山、琅邪

二郡不言州所治。據此志蓋治卽邱也。

沂水縣。舊置南青州及東安郡。案魏皇興初置東徐州于團城。其後以下邳爲東徐州。而改東徐爲南青。

東海郡。漣水縣。舊曰襄賁。置東海郡。東魏改曰海安。海安當作海西。魏志襄賁縣。蕭鸞置東海郡。武定二年。改置海西郡。

下邳郡。夏邱縣。又梁置潼州。後齊改曰睢州。案魏志睢州。武定元年。改置。當云東魏不當云後齊。淮陽縣。又有梁臨清、天水、浮陽三郡。東魏并爲甬城縣。甬城。魏志作角城。太平寰宇記。角城在今宿遷縣東南百一十一里。縣道記云。舊理在淮之北。泗水之西。亦謂之泗城。晉義熙中。于此置淮陽郡。仍置角城縣。梁改角城爲淮陽縣。後魏改爲角城縣。

江都郡。山陽縣。有後魏淮陰郡。東魏改爲淮州。案魏志淮州。蕭衍置。魏因之。治淮陰城。則淮州乃梁所置。非東魏所改。且淮陰諸郡。自侯景之亂。始入于魏。永熙以前。非魏所有也。

盱眙縣。舊魏置盱眙郡。案盱眙郡。晉安帝所立。非始于魏。魏字衍。

六合縣。舊曰尉氏。置秦郡。後齊置秦州。案梁書杜崩傳。齊將郭元建。攻秦州。刺史嚴超遠于秦郡。則秦州之名。梁末已有之矣。陳書高宗紀。太建十年八月。改秦郡爲義州。十月。罷義州。志亦失書。

永福縣。梁置涇城、東陽二郡。陳廢州。并二郡爲沛郡。此處有脫文。胡三省通鑑注引此云。梁置涇州。涇城、東陽二郡。當從之。北史潘樂傳。涇州舊在石梁。侯景改爲淮州。樂獲其地。仍立涇州。此梁置涇州之證也。

鍾離郡。後齊曰西楚州。此梁之北徐州也。當云舊置北徐州。史脫文也。楚州治鍾離城。見于魏收志。亦當云東魏改楚州。皆志之脫漏。

淮南郡。舊曰豫州。後魏曰揚州。梁曰南豫州。東魏曰揚州。此宋齊之豫州也。東昏時。裴叔業以州降魏。改爲揚州。普通七年。梁復取之。仍爲豫州。而以合肥爲南豫州。太清元年。侯景內附。乃移豫州于懸瓠。而以壽陽爲南豫。改合肥爲合州。其明年。懸瓠仍入東魏。又明年。壽陽亦入東魏。仍爲揚州矣。

弋陽郡。定城縣。後齊置南郢州。後廢。案。魏志。南郢州有二。此南郢卽治赤石關者。武定八年。卽齊天保元年。故此志以爲後齊所置。其實始于梁末也。

殷城縣。梁置義城郡及建州。并所領平高、新蔡、新城三郡。平高當作高平。考魏志。南建州。蕭衍置。魏因之。領高平、新蔡、陳畱、魯、南陳、光城、清河七郡。而新城郡別屬南朔州。與此志互異。

蘄春郡。浠水縣。宋志作希水。

黃梅縣。舊曰永興。開皇初。改曰新蔡。案。晉志。孝武因新蔡郡人于漢九江王鯨布舊城。置南新蔡郡。元

和郡縣志九江故城在黃梅縣西南七十里漢九江王鯨布所築然則隋改縣名曰新蔡因晉宋郡名也。

廬江郡梁置南豫州又改爲合州案梁天監五年章叡取合肥移豫州治焉普通七年改爲南豫州太

清元年改合州

同安郡梁置豫州後改曰晉州案齊末失壽陽乃于晉熙立豫州梁天監五年移豫州治合肥蓋晉熙

之爲豫州僅六七年耳大寶元年鄱陽王範以晉熙爲晉州

宿松縣梁置高塘郡高塘當作高唐陳書高宗紀太建九年分江州晉熙高唐新蔡三郡爲晉州是也

程靈洗傳出爲高唐太守

丹陽郡當塗縣舊置淮南郡平陳廢郡并襄垣平湖樊昌西鄉入焉平湖當作于湖樊昌當作繁昌

宣城郡綏安縣梁末立大梁郡又改爲陳畱平陳郡廢省大德故鄣安吉原鄉四縣入焉案陳書高祖

紀永定二年以廣梁郡爲陳畱郡卽此大梁也又陳詳傳割故鄣廣德爲廣梁郡蓋在梁敬帝之世故

云梁末也志改廣爲大蓋避隋煬帝名而陳畱郡不云陳所改則考之未審矣大德卽廣德亦避隋諱

改

吳郡烏程縣舊置吳興郡梁末嘗于吳興置震州尋省史失書

東陽郡金華縣舊曰長山置金華郡平陳郡廢。案梁陳之際有東陽郡而無金華郡陳後主子有東陽王恠可證陳時仍爲東陽郡也。志云舊置金華郡誤。又陳初嘗于東陽置縉州志亦失書。

南郡松滋縣江左舊置河東郡。陳時嘗置南荊州于河東郡志失書。

春陵郡春陵縣舊置安昌郡。北史蠻傳云延昌元年拜桓叔興南荊州居安昌是南荊州治安昌也。魏

志無此州。

湖陽縣後魏置西淮安郡及南襄州後郡廢州改爲南平州西魏改曰昇州後又改曰湖州。案周本紀

魏廢帝三年改南襄爲湖州南平爲昇州是南襄與南平明是兩州隋志似混而爲一。

蔡陽縣梁置蔡陽郡後魏置南雍州。案魏之南雍州治蔡陽魏收志無之。

漢東郡唐城縣又有東魏南□州。魏志亦無此州。

永安郡黃陂縣後齊置南司州後周改曰黃州。案陳書太建五年以黃城爲司州治下爲安昌郡蓋因

後齊南司州之名卽此黃陂也。黃州本因黃城得名隋開皇初乃移于齊安。

義陽郡鍾山縣舊曰鄆後齊改曰齊安仍置郡。案魏志南司州齊安郡齊安縣俱正始元年置是齊安

之名不始于後齊也。

江夏郡梁分置北新州尋又分北新立土富洞豪泉五州。案漢東郡土山縣梁置土州而此地又立土

州。一在江北。一在江南。豈同時有兩土州乎。

蒲圻縣。梁置上雋郡。又有沙陽縣。置沙州。案。魏志。沙州領建寧、齊安二郡。蕭衍置。魏因之。治曰沙關城。

其地在今光山麻城二縣界。而江夏之沙陽。又置沙州。然則梁時江北江南各有沙州矣。

澧陽郡。房陵縣。舊曰作塘。塘當作唐。

安鄉縣。舊置義陽郡。平陳郡廢。案。宋志。荊州有南義陽郡。晉末以義陽流民僑立。領厥西、平氏二縣。其

地在漢東郡。唐城縣志稱。唐城。後魏曰灑西。置義陽郡者是也。此安鄉之義陽郡。宋齊二志俱無之。未

詳何代所置。

廿二史考異卷三十四

隋書一

經籍志一

周易二卷。魏文侯師卜子夏傳。殘缺梁六卷。按阮孝緒七錄撰於梁普通中。志所云梁者。阮氏書也。梁有魏司農卿董遇。注周易十卷。按漢魏至宋齊九卿官名。皆不繫以卿字。至梁乃有司農卿。少府卿之稱。此志載魏司農卿董遇。吳太常卿徐整。晉少府卿華嶠。魏衛尉卿應璩。晉衛尉卿石崇。晉太常卿潘尼。晉太僕卿王嶠。宋太常卿蔡廓之類。皆史臣不諳官制。以意增之。

詩神泉一卷。本名神淵。見後漢書趙長君撰唐人避諱改。

毛詩義疏二十九卷。沈重撰。周書儒林傳作二十八卷。

周官禮義疏四十卷。沈重撰。周書儒林傳作三十一卷。

喪服疑問一卷。樊氏撰。按周書樊深傳。喪服間疑一卷。蓋卽此書。

禮記義疏四十卷。沈重撰。周書儒林傳作三十卷。

禮記文外大義二卷。祕書學士褚暉撰。按儒林傳。吳郡褚輝。與暉同煬帝時。爲太學博士。撰禮疏一百卷。

與此互異。

王氏史記二十一篇。漢書作王史氏。王史，複姓也。漢有新豐令王史。晉見廣韻。此衍一氏字。

春秋土地名三卷。晉裴秀、客京、相璠等撰。按志中一書而重出者，如京、相璠、春秋土地名三卷。一見春

秋類。一見地理類。李燧、戰國春秋二十卷。一見古史類。一見霸史類。裴子野、衆僧傳二十卷。一見雜傳

類。一見雜家類。諸葛武侯集誠二卷。總集作一卷衆賢誠十三卷。總集作十卷女鑒一卷。婦人訓誠集十一卷。娣

姒訓一卷。曹大家女誡一卷。貞順志一卷。俱一見儒家類。一見總集類。又如服虔春秋漢議駁二卷。兩

收於春秋類。趙陝甲寅元麻序一卷。兩收於麻數類。庾季才地形志。兩收於五行類。而前云八十七卷。

後云八十卷。本傳作八十七卷皆史臣惰疏之失。唐宋而後，志藝文者，重複益甚矣。

梁有漢劉歆、韃爲文學。中黃門李巡、爾雅各三卷。韃爲文學，卽舍人也。陸德明云：韃爲郡文學。卒史臣

舍人。漢武帝時待詔，蓋其人姓名人。

白虎通六卷。禮儀志引白武通。蓋唐初史臣避諱，改虎爲武。此志亦當作武。後來校書者輒改。

七經義綱二十九卷。樊文深撰。七經論三卷。樊太深撰。質疑五卷。樊文深撰。按周書儒林傳，深撰七經

異同說三卷。義經略論并目錄三十一卷。與此志名目互異。

江都集禮一百二十六卷。按潘徽序此書云：凡十二帙，一百二十卷。此衍六字。且此書本爲議禮而作。

乃不入禮家。又不入儀注。而附於論語之末。亦失其倫。

而又有尙書中候、洛罪級、五行傳、詩推度災、汜麻樞、含神務、孝經勾命決、勾與鈎同援神契、雜讖等書。按詩推度災以下五篇。卽在七經緯三十六篇之內。五行傳乃伏生尙書大傳中之一篇。非緯書也。洛罪級之名。它書未見。

孔子曰。必也正名乎。名謂書字。鄭康成論語注云。正名謂正書字也。古者曰名。今世曰字。禮記曰。百名以上。則書之於策。孔子見時教不行。故欲正其文字之誤。後魏書。世祖始光二年。初造新字千餘。詔書引孔子名不正。則事不成之語。江式論書表。亦引孔子曰。必也正名乎。此漢儒相承之詁訓。許氏說文序云。於其所不知。蓋闕如也。則亦以正名爲正文字矣。許君在鄭之前。知其說不始於鄭氏也。北齊書李鉉傳。鉉以去聖久遠。文字多有乖謬。感孔子必也正名之言。

自後漢佛法行於中國。又得西域胡書。能以十四字貫一切音。文省而義廣。謂之婆羅門書。按華嚴字母之法。蓋濫觴於此。其初本十四音。後乃益爲四十二也。

凡六藝經緯六百二十七部。按孔穎達詩正義序稱全緩、劉軌思、劉醜、劉焯俱有義疏。春秋正義引衛冀隆難、杜秦道靜釋、蘇寬義疏、劉炫規過、賈公彥儀禮疏、引黃慶、李孟、哲二家章疏。陸德明經典釋文有周宏正周禮音。已上諸書。唐初儒者皆見之。而隋志不載。并不在亡書之數何也。又沈重毛詩音二

卷、周禮音一卷、儀禮音一卷、禮記音二卷、儀禮義三十五卷、喪服經義五卷、樊深孝經問疑一卷、熊安生周禮義疏廿卷、禮記義疏四十卷、孝經義疏一卷、見於周書、明克讓孝經義疏、劉焯五經述議、劉炫春秋攻昧十卷、何妥孝經義疏三卷、辛德源集注春秋三傳三十卷、張沖孝經義三卷、劉善經四聲指歸一卷、見於隋書、而志皆遺之、或謂志所錄者、僅唐初所收東都圖籍、漂沒之餘、固宜漏落、然史臣自言於舊錄之外、更有附入、則有附有否、難辭絀漏之咎矣。

經籍志二

史記音義十二卷、宋中散大夫徐野民撰、卽徐廣也、隋人避諱、因稱其字、然廣又有晉紀四十五卷、車服雜注一卷、亦在本卷內、卻稱名不稱字、蓋唐時修史、不出一手、故多駁文、又如民字避唐諱、例當作人、而農家類或云四人、月令或云齊民要術、春秋類有尙書左人郎荀訥、此徐野民仍用本字、則由後來校書者妄改、又不能盡改也。

漢書續訓三卷、梁北平譚議參軍韋稜撰、北平當作平北。

梁史五十三卷、陳領軍大著作郎許亨撰、今以許善心傳考之、此書目錄凡百卷、撰成上祕閣者、僅六帙五十八卷、蓋未成之書、然卷數亦不合。

淮海亂離志四卷、蕭世怡撰、按北史蕭圓肅撰淮海亂離志、不云世怡所撰、劉知幾又以爲蕭大園作。

未審孰是。世怡本名泰，鄱陽王恢之子。圓肅者，武陵王紀之子。大圓則簡文子也。

古今注八卷。伏無忌撰。章懷注。後漢書屢引之。所謂伏侯古今注也。

托跋涼錄十卷。不著撰人。當是紀南涼事。禿髮卽托跋聲之轉也。

梁舊事三十卷。內史侍郎蕭大環撰。環當作圓。

汝南君諱議二卷。按三國志張昭傳注云。汝南主簿應劭議宜爲舊君諱。論者互有異同。張昭箸論非

之。漢人以郡守爲君也。

道人善道開傳一卷。善當作單。

齊諧記七卷。宋散騎侍郎東陽元疑撰。元當作无。廣韻。東陽無疑撰齊諧記。

洛陽圖一卷。晉懷州刺史楊佺期撰。按晉無懷州。當是雍州之譌。

京口記二卷。宋太常卿劉損撰。唐志作劉損之。

隋王八河記六卷。隋當作隨。此校書人妄改。

湘州記一卷。郭仲彥撰。唐志彥作產。

宋武北征記一卷。戴氏撰。戴名延之見水經注。

北伐記七卷。諸葛穎撰。巡撫揚州記七卷。諸葛穎撰。按穎傳云。撰鑾駕北巡記三卷。幸江都道里記一

卷蓋卽此兩書而書名卷數俱不合。

隋區宇圖志一百二十九卷。按崔頌傳大業五年受詔與諸儒撰區宇圖志二百五十卷奏之。帝不善之。更令虞世基許善心衍爲六百卷。是此書曾經再修。然皆非百廿九卷也。

凡史之所記八百一十七部。按史部之見於列傳者如于仲文漢書刊錄三十卷。張冲前漢書義十二卷。許善心梁書七十卷。榮建緒齊紀三十卷。杜臺卿齊紀廿卷。王劭齊書紀傳一百卷。平賊記三卷。皇隋靈感志三十卷。柳晉王北伐記十五卷。明克讓古今帝代記一卷。續名僧記一卷。宇文愷東都圖記廿卷。明堂圖議二卷。劉善經酬德傳三十卷。諸劉譜三十卷。諸葛穎洛陽古今記一卷。志皆遺之。

經籍志三

正論六卷。漢大尙書崔寔撰。按後漢書崔寔作政論亦無大尙書之名。此志大尙書崔寔凡再見。正訓二十卷。內訓二十卷。志皆不箸撰人。蓋辛德源所撰也。本傳正作政。

長洲玉鏡二百三十八卷。大業初祕書館學士虞綽祕書郎虞世南箸作佐郎庾自直等奉詔撰。見虞綽傳。

太公六韜五卷。周文王師姜望撰。按三代以前男子無稱姓者。稱太公望曰姜望。此魏晉以後俚俗之言。

金韜十卷。志不箸撰人。蓋劉祐所撰。見藝術傳。

陰策二十二卷。大都督劉祐撰。本傳作二十二卷。按志傳卷數互異者。如蕭吉樂譜集二十卷。傳作十

二卷。傳無集字張冲論語義疏二卷。傳作十卷。傳無疏字王劭齊志十卷。傳作廿卷。魏彥深後魏書一百卷。傳作

九十二卷。庾季才靈臺祕苑一百一十五卷。傳作一百二十卷。蕭吉相經要錄二卷。傳作一卷。薛道衡

集三十卷。傳作七十卷。李元操集十卷。傳作廿卷。魏彥深集三卷。傳作三十卷。諸葛穎集十四卷。傳作

廿卷。李德林集十卷。傳作五十卷。柳詵集五卷。傳作十卷。辛德源集三十卷。傳作廿卷。蕭欣集十卷。周

書本傳作三十卷。

錄軌象以頌其章一卷。此不似書名。疑有譌。

垂象志一百四十八卷。志不箸撰人。蓋庾季才所撰。本傳作一百四十二卷。

綴術六卷。志不箸撰人。當是祖冲之撰。

五經算術一卷。志不箸撰人。蓋甄鸞所撰。

八會堪餘一卷。按周禮疏引堪輿大會有八。小會有八。卽此書也。輿餘音同。

產乳書二卷。志不箸撰人。藝術傳。劉祐箸產乳志三卷。疑卽此。

地動圖一卷。志不箸撰人。藝術傳。臨孝恭箸地動銅儀經一卷。

黃帝素問八卷。全元越注。袁廷構曰：越當作起。

凡諸子合八百五十三部。按：子部見於列傳者，如何晏莊子義疏三卷、辛德源注揚子法言廿三卷、張

昞道言五十二篇、王劭讀書記三十卷、柳晉法華元宗廿卷、劉焯滑極十卷、麻書十卷、諸葛穎馬名錄

二卷、來和相經四十卷、耿詢鳥情占一卷、蕭吉宅經八卷、葬經六卷、相木板要決一卷、太一立成一卷、

臨孝恭敬器圖三卷、九宮五墓一卷、遯甲月令十卷、元辰經十卷、元辰戾一百九卷、百怪書十八卷、祿

命書二十卷、九宮龜經一百一十卷、太一式經三十卷、孔子馬頭易卜書一卷、劉祐觀臺飛候六卷、元

象要記五卷、律麻術文一卷、婚姻志三卷、式經四卷、四時立成法一卷、安麻志十二卷、歸正易十卷、志

皆遺之。

經籍志四

晉太傅郭象集二卷。袁廷構曰：太傅下脫主簿二字。

益陽令吳商集五卷。按：禮類有晉益壽令吳商禮難十二卷、益陽縣名屬衡陽郡，作益壽者誤。

宋徵士宗景集十六卷。宗炳字少文，避諱改爲景。

元真處士劉許集一卷。許當作訐。

文海五十卷。志不著撰人，按：北史蕭圓肅撰時人詩筆，爲文海四十卷，卽此。

百賦音十卷。宋御史褚詮之撰。按宋子京校漢書揚雄三賦屢引諸詮音。蓋卽此書。譌褚爲諸。又脫之字。耳。子京未必親見此書。蓋采諸蕭該漢書音義也。顏氏家訓勉學篇云。習賦誦者。信褚詮而忽呂忱。亦指此書而言。

大隋封禪書一卷。志不箸撰人。蓋何妥所撰。見儒林傳。

西府新文十一卷。梁蕭淑撰。按顏氏家訓文章篇。梁元帝在藩邸時。撰西府新文紀志。云蕭淑者。當是元帝幕僚奉命撰集者。

凡集五百五十四部。按集部見於列傳者。如李文博治道集十卷。明克讓集廿卷。劉臻集十卷。庾自直集十卷。孫萬壽集十卷。志皆遺之。

鄭譯傳

內史中大夫烏丸軌。按周時功臣多賜代北姓。如王軌賜姓烏丸氏。史於鄭譯。梁士彥。宇文忻。賀若弼。達奚長儒。元巖。來和。傳書烏丸軌。於崔仲方。和。洪。傳書王軌。竇毅。賜姓紇豆陵氏。史於高祖紀。書竇毅。於李德林。傳書紇豆陵毅。此亦例之不一也。

前後所論樂事。語在音律志。按牛里仁傳亦云。與姚察。許善心。何妥。虞世基等。正定新樂。事在音律志。又裴政傳云。嘗與長孫紹遠論樂。語在音律志。今隋史有音樂志。有律麻志。無所謂音律志也。何稠傳。

云大業初營造輿服羽儀事見威儀志。閻毗傳云毗立議輦輅車輿多所增損語在輿服志。今隋志祇有禮儀志無所謂威儀輿服志也。史不出一人之手欲其首尾義例無一踳駁固是難事然不應如是之甚也。

長孫晟傳

以其子雍閻爲葉護可汗。突厥傳作雍虞閻。

長子行布次子恆安。按唐書宰相世系表不見此二人名。

韓擒傳

擒本名豹。唐人諱虎史多改爲武或爲獸或爲彪。此獨更爲豹者欲應黃班之文也。虎豹皆有斑黃韓聲亦許近。

賀若弼傳

陳將魯達周智安任蠻奴。陳書作魯廣達。此避諱去一字。蠻奴本名忠亦避諱稱其小字。

盧愷傳

於是除名爲百姓。此避唐諱改民爲百姓也。隋書成於貞觀之世其時二名不偏諱而此傳及酷吏田式傳竝云除名爲百姓。

令狐熙傳

熙以州縣多有同名者。於是奏改安州爲欽州。黃州爲峯州。利州爲智州。德州爲驩州。東寧爲融州。按地理志。開皇十八年。改黃州曰玉州。改興州曰峯州。此傳恐有脫文。

李景傳

天水休官人也。地理志。天水郡無休官縣。

閻毗傳

帝嘗大備法駕。嫌屬車太多。按毗所奏大駕法駕屬車之數。及煬帝改大駕三十六乘。法駕十二乘事。已見禮儀志。不當重出。

誠節傳

劉子翊。擢授治書侍御史。切諫忤旨。遣於上江督運。爲賊吳棊子所虜。子翊說之。因以衆首。復遣領首賊清江。遇煬帝被殺。賊知而告之。子翊弗信。斬所言者。賊又欲請以爲主。子翊不從。羣賊執子翊至臨川城下。使告城中云。帝已崩。子翊反其言。于是見害。按唐書林士宏傳。隋季與鄉人操師乞起爲盜。大業十二年。據豫章。隋遣治書侍御史劉子翊討賊。射殺師乞。士宏收其餘衆。復戰彭蠡。子翊敗。死之。是子翊死于大業十二年。其時煬帝尙無恙。與隋書所載。絕不相符。豈同時有同姓名而同爲治書侍

御史者乎。恐二書必有一誤。

儒林傳

元善。祖又。魏侍中。父羅。初爲梁州刺史。按羅與又爲昆弟。故有夜叉羅刹之稱。不得爲父子也。據北史。

善之父名舒。不名羅。

文學傳

王貞。孝逸。生於戰爭之季。貞與齊王啓。不稱名而稱字者。避隋廟諱。以字行也。隋文帝祖名禎

藝術傳

庚季才。與王褒。庾信。同補麟趾學士。此稱庾信。後又稱宗人信。於例未安。

外戚傳

獨孤陁。弟整。官至幽州刺史。按唐書外戚傳。整仕隋爲涿郡太守。蓋大業初改幽州爲涿州。刺史爲

太守。名殊而實同也。

高昌傳

初蠕蠕立闕伯周爲高昌王。此稱蠕蠕。後又稱茹茹。史駁文。

王充傳

王充字行滿。本名世充。避唐太宗名。單稱一字。隋史於世字不諱。而獨去世充者。嫌篇中多醜詞也。然於越王侗、張衡、楊汪、薛道衡、王韶、李密諸傳。仍稱世充。而傳載道士桓法嗣。取莊子人閒世。德充符二篇上之。云上篇言世。下篇言充。此卽相國名。則亦未之諱也。

廿二史考異卷三十五

南史一

宋本紀上

武帝。劉裕龍行虎步。唐人修晉梁陳齊周隋諸史。避廟諱。改虎爲武。或爲獸。或爲猛獸。或爲彪。南史於此字多不避。如宋武帝紀。龍行虎步。忠臣碎于虎口。潛構崎嶇。過于履虎。寧州獻虎魄枕。梁武帝紀。龍行虎步。陳武帝紀。龍驤虎步。龍行虎步。宣帝紀。此人虎頭。當大貴。趙伯符傳。如與虎狼居。蕭惠開傳。蜀人號曰臥虎。王僧虔傳。優者龍鳳。劣猶虎豹。黃回傳。朝廷畏之如虎豹。梁宗室傳。寧逢五虎入市。任昉傳。彪虎嘯而清風起。媿人靈于豺虎。羊侃傳。郎官謂卿爲虎。豈羊質虎皮乎。試作虎狀。侯景傳。太極殿前作虎視。以及蕭琛傳之虎皮靴。臧燾傳之白虎通。范蔚宗傳之虎帳岡。王僧辯傳之白虎艦。皆後來校書者所改。非延壽本文也。宋文帝紀。猛獸入郭內。劉湛傳。小字猛獸。顧憲之傳。獸而冠耳。獸卽虎字。梁宗室傳。但畏合肥有韋武。韋叡傳。且願兩武勿復私鬪。武亦虎字。袁顛傳。今日之行。本願生出彪口。彪亦虎字。此類則校書者不知而仍存之。宋齊梁陳本紀俱有虎賁之士三百人。殷淑儀。長沙王道憐。臨川王道規。江夏王義恭。豫章王嶷傳俱有虎賁班劍。劉穆之。徐孝嗣。章陵王子良。劉懷珍傳俱有

虎賁中郎將。齊高帝紀、虎賁劍戟、文惠太子傳、虎賁雲罕之屬、皆校者追改。而宋前廢帝紀、武賁劍戟、劉師知傳、武賁鼓吹、恩倖傳、武賁中郎將、仍未改。齊高帝紀、索白虎幡、王儉傳、發白虎幡、蕭穎胄傳、朝廷以白虎幡追我、柳仲禮傳、以白虎幡解軍、亦皆追改。而王曇首傳、應須白獸幡、仍未改。宋少帝紀、魏軍剋虎牢、梁武帝紀、進剋虎牢、王鎮惡傳、破虎牢、到彥之傳、魏滑臺虎牢洛陽守兵竝走、彥之留尹冲守虎牢、柳元景傳、魯爽向虎牢、沈慶之傳、虎牢洛陽自然不固、皆追改。而宋文帝紀、魏剋武牢、仍未改。江夏王義恭傳、登虎邱山、謝舉傳、自虎邱山出赴之、復爲虎邱山賦、顧協傳、游虎邱山、皆追改。而何季傳、至吳、居武邱山、顧協傳、棲隱于武邱山、仍未改。宋武帝紀、好出神武門內、梁敬帝紀、起雲龍神武門、陶貞白傳、脫朝服挂神武門、陳宣帝紀、改作雲龍神獸門、梁、丁貴嬪傳、詣神獸門、奉牋致謁、江夏王義恭傳、諸子竝神獸門外、傅亮傳、見客神獸門外、鄭鮮之傳、詣神獸門求啟事、王茂傳、羣盜燒神獸門、張惠紹傳、夜燒神獸門、張宏策傳、至夜燒神獸門、神武、神獸、本神虎也。今本丁貴嬪、王茂、張惠紹傳、或有作神虎者、亦後人所改。沈攸之傳、率軍據虎檻、五軍在虎檻、建安王休仁屯虎檻、胡三省云、虎檻、洲名、在緒圻東北、江南也。而建安王休仁傳云、出據獸檻、鄧琬傳云、自武檻進、據緒圻、有改有不改。王瑩傳前云、猛獸入郭、後云、虎象來格、亦有改有不改。周鐵武本名鐵虎、本傳、及王琳、周文育傳、俱作武字、而陳文帝紀、故護軍將軍周鐵虎、獨改虎字。曹武本是曹虎、本書皆作武字、而范元琰傳、徵爲曹武平西參軍、今刊

本亦有改爲虎者。北史韓擒虎但稱韓擒，去下一字。南史魯廣達任忠，樊猛傳稱隋將韓擒者，延壽本文也。而陳本紀及太子深、孔範傳作韓擒虎，亦後人所添。今本魯廣達傳亦或有加虎字者，皆緣校書之人不知史臣當避諱，而以意改易，又不能盡改也。

丙辰候城門開。晉書北史避唐諱，改丙爲景，惟南史仍作丙，亦後人追改。獨陶貞白傳以宋孝建三年景申歲夏至日生，此景字未及改。

五月至下邳。上文云經客下邳逆旅，又云以帝爲下邳太守，皆謂江左僑置之下邳，此以北伐浮淮入泗，乃至下邳，則是漢晉之故郡也。

帝率舟師南伐，使劉毅監太尉留府。按宋書是歲六月，更授公太尉中書監，加黃鉞，受黃鉞，餘固辭。至次年，改授太尉中書監，乃受命，則南伐盧循之時，只是中軍將軍，未爲太尉，不當云監太尉留府也。晉書劉毅傳但云知內外留事。

於是改授太尉中書監，乃受命，奉送黃鉞。按前年已有太尉中書監，加當作黃鉞之命，惟受黃鉞，餘皆不受，故此云送黃鉞，又云乃受命也。南史刪去上一節，則送黃鉞之語無著，下文不得云又假黃鉞矣。率衆西討，復加黃鉞，領荊州刺史，加當作假，晉宋之制，使持節得殺二千石以下，假黃鉞則可專戮節將矣。宋武西伐劉毅，已假黃鉞，毅平仍奉還之，至是伐司馬休之，又假黃鉞，毅與休之皆持節大臣，必

假黃鉞乃可行戮。南史於毅平之後，刪奉還黃鉞一節，則此文復加黃鉞，又無著矣。

以桂陽公義真爲雍州刺史，鎮長安。是時義真以安西將軍、都督軍事、安西司馬、王鎮惡、安西長史、王脩、安西中兵參軍、沈田子皆義真府之僚屬也。延壽於此處刪安西將軍四字，至關中亂後，乃云遣朱齡石代安西將軍、桂陽公義真爲雍州刺史。前略而後詳，敘事亦不明白。若移安西將軍於此文，雍州刺史之上，則前後貫串有法矣。李氏刪省舊文，往往未當，略舉一二以見義。

永初元年，詔曰：彭城、桑梓、敦本、斯隆，宜同豐沛。其沛郡、下邳各復租布三十年。此彭城、沛、下邳三郡，皆僑置於江南者。宋書州郡志：南徐州、南彭城郡、江左僑立。晉明帝又立南下邳郡，成帝又立南沛郡。宋孝武以二郡并南彭城。按此三郡有戶口而無道里，大約僑居京口。

三年，進江州刺史王弘衛將軍、開府儀同三司。按本紀書除免者，唯三公、尚書令、僕射、儀同三司，其餘皆不書。此王弘以儀同三司，故特書。而永初元年，左光祿大夫孔季恭，元嘉十六年，特進左光祿大夫王敬宏，大明七年，驃騎大將軍柳元景，皆加開府儀同三司，紀何以不書。此史例之可議者也。

宋本紀中

文帝。元嘉七年十月，魏剋金墉城。十一月，又剋虎牢。按景平元年，金墉、虎牢二城已爲魏所取矣。至是年北伐，乍復而旋失，史既不書二城之得，又何必書二城之陷乎。

孝武帝。孝建三年立皇弟休範爲順陽郡王。休若爲巴陵郡王。皇子子尙爲西陽郡王。按皇子封王者皆郡王也。紀皆不不書郡。獨此條有郡字。梁簡文子大心等始封皆書郡王。及遇害仍不書郡。此亦體例之可議者。

宋本紀下

明帝。泰始元年江州刺史晉安王子勛舉兵反。按湘東弒君自立。子勛舉兵討之。義也。當時朝野具

有公論。明帝謂蔡興宗曰。諸處未定。蔡琰已復同逆。興宗曰。逆之與順。臣無以辨。宋書蔡興宗傳蕭惠開自益

州至都。明帝問其故。惠開從容答曰。臣唯知逆順。不識天命。南史蕭惠開傳此斯民之直道。百世不

可揜者也。紀書子勛舉兵反。其黨皆云同逆。竝據宋書舊文。事隔數朝。不當猶徇曲筆。

四年改封山陽王休祐爲晉平王。按宋齊二志俱不載晉平郡。史之闕也。以六年改臨賀郡爲臨慶郡

之例準之。亦當書改晉安郡爲晉平郡。此刪省之失當也。

六年改臨賀郡爲臨慶郡。賀與禍音相似。故改之。猶改駟爲駟也。

七年以皇子躋繼江夏文獻王義恭。義恭傳失書此事。

帝疾間。王懋竑曰。前不書有疾。而後云疾間。非史例也。

後廢帝。孝武帝二十八子。明帝殺其十六。餘皆帝殺之。通鑑考異云。孝武諸子。十人早卒。二人爲景

和所殺。餘皆太宗殺之。無及蒼梧時者。南史誤也。予按沈約書本無此文。延壽采它書益之。考宋書孝武十四王傳。泰始六年。詔曰。世祖繼體。陷憲無遺。今以第九子智隨奉世祖爲子。則孝武之嗣。絕于明帝之世。史固有明文矣。

齊本紀上

高帝。建元二年正月戊戌朔。以司空褚彥回爲司徒。十二月戊戌。以司空褚彥回爲司徒。二文重出。蓋承南齊書之誤。

武帝。建元四年六月。進封江陵公子懋爲晉安王。據此。則晉平之復爲晉安。當在其時。臨慶之爲臨賀。廣興之爲始興。大約皆在齊初。子顯志竝略而不書。失之太簡矣。

皇孫昭業爲河南郡王。河字衍。上文立河南王長懋爲皇太子。亦當爲南郡王之誤。
永明十年。按是年四月辛丑。大司馬豫章王嶷薨。紀失書。

齊本紀下

廢帝海陵王。漢文帝晏駕。而鼎業傾移也。漢字誤。文帝謂文惠太子也。

廢帝東昏侯。永元二年四月。以新除尙書右僕射蕭懿爲尙書令。十月。殺尙書令蕭懿。按長沙王懿傳。授中書令。東昏將加酷害。徐曜甫勸令西奔。懿不從。曰。古皆有死。豈有叛走中書令耶。初。不言除尙

書令。然梁書安成王秀傳。懿入平崔慧景。爲尙書令。居端右。則實爲尙書令。恐懿傳誤耳。
和帝。中興二年三月。誅邵陵王寶攸。晉熙王寶貞。按南齊書本紀。邵陵王寶攸。晉熙王寶嵩。桂陽
王寶貞。伏誅。此紀蓋有脫文。寶攸。列傳作寶脩。

梁本紀上

武帝。時宋帝昏虐。齊高謀出外。皇考肅順以爲一旦奔亡。則危幾不測。不如因人之欲。行伊霍之事。齊

高深然之。按南齊書豫章王嶷傳。太祖帶南兗州鎮軍府長史蕭順。順之在鎮。憂危旣切。期渡江北
起兵。嶷諫曰。主上狂凶。人下不自保。單行道路。易以立功。外州起兵。鮮有克勝。物情疑惑。必先人受禍。
今於此起計。萬不可失。此二說意略相同。一以爲順之一以爲嶷。未詳孰是。南史嶷傳亦載此語。

時上長兄懿罷益州還。仍行郢州事。乃使張宏策詣郢陳計于懿。語在懿傳。按長沙王懿傳。永元二年。
裴叔業據豫州反。懿以豫州刺史。領歷陽。南譙二郡太守。討之。武帝時在雍州。遣典籤趙景悅說懿興
晉陽之甲。誅君側之罪。懿不答。傳中初未有罷益州還。仍行郢州事之文。亦未有遣張宏策陳計之語。
其語乃在宏策傳。非懿傳也。

天監元年四月。改南東海爲蘭陵郡。按蕭整渡江。居武進縣之東城里。齊梁二代。皆其後裔。自稱南蘭
陵。南蘭陵上郡下縣中都里人。南齊志不載南蘭陵郡。則齊世嘗併省。至是改南東海爲蘭陵郡。治京口。而

改武進爲蘭陵縣。郡縣皆有實土矣。

閏月以行宕昌王梁彌邕爲安西將軍、河涼二州刺史。正封宕昌王。西戎傳無彌邕名。

梁本紀中

武帝中大通元年五月元顥入京師。僭號建武。閏月魏將余朱榮攻殺元顥。京師反正。此梁史非魏史。當以梁都爲京師。不當以魏都爲京師。依史法當云元顥入洛陽。改元建武。顥旣爲梁所立。卽不可斥爲僭也。京師反正之語尤爲無謂。延壽意雖內北而外南。然於此等書法。則所謂自亂其例。不如姚思廉書法之當矣。

酉應見卯。金來剋木。卯爲陰賊。鬼而帶賊。非魔何也。按坤卦上六癸酉立世。六三乙卯爲應。坤爲土。乙

卯木。坤之鬼也。卯又爲陰賊。見漢書翼奉傳故云鬼而帶賊。

梁本紀下

元帝承聖三年十二月魏人戕帝。南北史諸帝崩例書年若干。惟宋順帝、齊海陵王、梁元帝、陳文帝、西魏廢帝、恭帝、齊後主闕之。此紀前書天監七年八月丁巳生。其年歲在戊子。則承聖三年戊甲。年四十有七。無可疑也。齊海陵王、陳文帝、西魏廢帝、恭帝。史不言其生年。則年壽遂無可考矣。南北諸帝紀中生年月日俱有者。宋武帝、孝武帝、明帝、前後廢帝、順帝、齊武帝、梁簡文帝、元帝、陳廢帝、宣帝、長城公。

魏道武帝、孝文帝、孝明帝、齊後主、隋文帝、有年月而無日者。魏文成帝、獻文帝、宣武帝、齊幼主、周靜帝、有年而無月日者。宋營陽王、文帝、齊高帝、梁武帝、陳武帝、魏明元帝、太武帝、周閔帝、明帝、武帝、宣帝、其餘皆不言生年。

敬帝 太平元年七月，以開府儀同三司侯瑱爲司空。梁書 按：瑱傳不載此事。陳本紀：永定二年正月，

以車騎將軍、開府儀同三司侯瑱爲司空，則梁時不應先有司空之拜。

十月，魏相安定公薨。按：高歡薨書名，而宇文泰不書名，延壽意蓋以周爲正也。自東西魏分時以後，東魏元象、興和、武定紀元，皆不書於南史。齊旣受禪，南史亦不載齊之紀年，而於周改元，則必書之。周諸帝稱崩，而齊諸帝稱殂，延壽之尊周而抑齊如此。

后妃傳上

鬱林王何妃 按：宋三廢帝、陳廢帝、後主之后，皆稱皇后。東昏褚后亦稱皇后，獨鬱林、海陵二后稱妃而不稱后。雖沿齊書之文，終失史法。或謂王之下不可更安皇后字，則東昏亦是侯國，何以得書皇后乎？但云鬱林何皇后、海陵王皇后，於辭亦無所嫌。

后妃傳下

武丁貴嬪 傳當書生昭明太子統及簡文皇帝云云，傳寫失之。

武宣章皇后。武帝先娶同郡錢仲方女。早卒。按仲方女。武帝永定元年。追謚昭皇后。依宋武敬臧皇后之例。亦宜立傳。不當附見也。

宋宗室諸王傳上

長沙王道憐。故青州刺史。龍陽縣公王鎮惡。本紀及鎮惡傳皆作龍陽縣侯。又按元嘉九年。以長沙王道憐等配饗廟庭。詔書已載于本紀。而此傳又具列其名。殊重複無當。此詔配饗六人。長沙臨川二王。劉穆之。王鎮惡俱已歿。王宏。檀道濟尙無恙。其後道濟以罪誅。竟不得與配食之典。齊武帝永明年。詔以褚淵。王儉。柳世隆。王敬則。陳顯達。李安民配享太祖廟庭。敬則。顯達後皆以謀反誅。與道濟事正同。

臨川王義慶。鮑照字明遠。東海人。上文已云東海何長瑜。鮑照則照爲東海人可知。不必更云東海人也。照當入文學傳。附見此篇。亦失其倫。此亦因沈約舊文。沈書不立文苑一篇。故因事附見。

文帝以爲中書舍人。按鮑照爲中書舍人。在孝武時。見恩倖傳。此云文帝者。誤也。照爲義慶所賞。及爲舍人。義慶薨已久矣。延壽因義慶薨於文帝時。并疑鮑照得官亦在文帝之世耳。

營浦侯遵考。及北伐平定。以爲并州刺史。領河東太守。鎮蒲坂。按宋志不載此州。以其暫置而旋失也。據宋書本傳。是時所督者。司州之北河東北平陽。北雍州之新平安定諸郡。皆非實土。

江夏王義恭。廢帝率羽林兵於第害之。并四子。按義恭十六子。元凶殺其十二。廢帝又殺其四。其封號事狀。具載沈約史。延壽何故闕而不書。且孝武以第四子子綏嗣義恭之世子。劼。明帝又以第八子躋繼義恭爲孫。皆傳所宜書者。而南史皆失之。與它傳例亦不一。恐轉寫有脫簡耳。

宋宗室諸王傳下

元凶劼。初濬母卒。命潘淑妃養以爲子。前文云潘淑妃生始興王濬。則濬實潘妃所生。宋書二凶傳亦無養子之說。延壽据它書增入。以致自相矛盾。

臨慶王休倩。以第五皇子智井爲東平王。繼休倩。未拜薨。按本紀。智井薨後。明帝又以第八子智渙繼之。此傳失書。

孝武帝二十八男。安陸王子綏。南平王子產。廬陵王子輿。竝出繼。按子產繼南平王鑠。子綏繼江夏王義恭。子輿繼廬陵王義真。俱爲明帝所害。史於鑠傳附書子輿事。而義恭義真二傳不及子綏子輿。亦爲疏漏。

明帝十二男。智井、燮、躋、贊。竝出繼。按宋書本紀。泰始六年十月。以第八皇子智渙繼臨慶沖王休倩。七年十月。以第八皇子躋繼江夏文獻王義恭。蓋智渙卽躋之小字。初繼臨慶。改嗣江夏也。

劉穆之傳

謂所親曰。貧賤常思富貴。富貴必踐機危。今日思爲丹徒布衣。不可得也。晉書諸葛長民傳。長民卽長人南史避

諱改以此爲長民之語。通鑑從晉書。胡三省謂長民琅邪陽都人。僑居京口。故有丹徒布衣語。然長民傳

不言僑居所在。予後讀南史諸葛璿傳。云琅邪陽都人。世居京口。以是推之。長民之僑居京口。可無疑也。

劉瑀傳

至江陵。與顏竣書曰。朱脩之三世叛兵。一日居荊州青油幕下。作謝宣明面相向。使齋帥以長刀引吾下席。按瑀爲益州刺史。在孝建三年。其時朱脩之爲荊州刺史。都督梁益諸州。瑀以統府之禮參謁。故有此言也。脩之祖序爲苻堅所執。脩之又嘗仕魏。故云三世叛兵。宋世常以諸王鎮荊州。庶姓惟謝晦與脩之二人。朱門望遠出謝下。瑀心尤不能平也。

劉秀之傳

時定制令。隸人殺長吏科。隸當依宋書作疑。人殺長吏。謂部民殺官長也。南北史避民字。如尙書左民

曹多改爲左戶。或爲左人。諸葛長人。徐野人。李安人。劉遺人之類。皆改民爲人。時議者謂民殺長吏。會赦宜以徙論。秀之以爲民敬官長。比之父母。若遇赦而徙。便與悠悠殺人。曾無一異。宜長付尙方。窮其天命也。人民義異而文相混。特爲別言之。

贈司空諡忠成公。秀之封康樂縣侯，而諡忠成公者，以贈三公故也。徐湛之本枝江縣侯，以贈司空。諡忠烈公。何尚之本都鄉侯，以贈司空。諡簡穆公。袁湛晉寧縣男，以贈開府儀同三司。諡敬公。王元謨曲江縣侯，以開府儀同三司。諡莊公。袁淑、袁昂、殷景仁、王敬宏皆無封爵。淑以贈太尉，昂以司空。景仁以贈司空。敬宏以贈開府儀同三司。故皆諡曰公。若位非台司，又無五等之封，而得諡者，例稱子。如張緒諡簡子，裴子野諡貞子之類是也。

徐孝嗣傳

八歲襲爵枝江縣公。按湛之封枝江縣侯，身後亦未見加封之文。其子何以得襲公爵。又考宋書州郡志，枝江止云侯相，不云公相，疑此誤也。

以廢立功封枝江縣侯。上文不書齊受禪例除封爵一節，則此文便難曉。

檀道濟傳

進位司空鎮壽陽。壽陽當作尋陽。宋書云還鎮尋陽。

王瞻傳

武帝笑稱嶷小名多王。嶷小名阿玉，見梁本紀，此文誤。

謝晦傳

時謝琨風華爲江左第一。琨當作混。混字叔源。當从水旁。彭城大會之時。混已先歿。南史敘事。往往失次。

永初二年。坐行璽封鎮西司馬南郡太守王華而誤封北海太守球板。免晦侍中。是時文帝以鎮西將軍領荊州刺史。華爲其府司馬兼領南郡太守。華傳但云代張邵爲司馬。不稱鎮西。又不云南郡太守。史之略也。球傳亦不載除北海太守。

謝宏徵傳

混仍世宰相。一門兩封。按南史諸帝紀。諸王三公而下。惟尙書令。左右僕射。拜罷卒皆書。蓋令僕位居端揆。當時固以宰相目之。混祖安石。位正台司。爲晉名相。而混父琰。亦嘗任尙書左僕射。贈司空。混又爲中領軍。尙書左僕射。故云仍世宰相。南史所載王儉爲左僕射。領選時已稱宰相。徐孝嗣。何敬容皆以尙書令僕稱宰相。王亮爲尙書左僕射。梁武有焉。用彼相之譏。則僕射可稱宰相矣。王僧達。孝武時爲右僕射。自負才地。三年間便望宰相。此宰相謂三公也。亦有官至令僕。而不預機密者。若謝舉。屢居端揆。未嘗肯預時政。王敬宏。關署文案。初不省讀。則人亦不以宰相目之矣。混父琰封望蔡縣公。兄峻又封建昌縣公。故云一門兩封。

與琅邪王慧。王球。竝以簡淡稱。王慧卽王惠也。古文惠與慧通。南史齊文惠太子或作文慧。謝幾卿王僧孺傳。

崔慧景或作惠景。王登傳。任昉傳想慧莊之清塵。謂惠施莊周也。今內府本作王惠。

謝瀟傳

苟得其人。自可流涵千日。劉悛父名勔。流涵音與劉勔同。因悛斥其父名。故亦以是報之。汲古閣本作

沈涵。非也。張景陽七命傾壺一朝。可以流涵千日。

謝舉傳

任昉出爲新安郡。別舉詩云。詎念耄嗟人。方深老夫託。按劉孝綽傳。孝綽爲歸沐詩。贈任昉。昉報曰。彼美洛陽子。投我懷秋作。詎慰耄嗟人。徒深老夫託。直史兼褒貶。轄司專疾惡。九折多美疾。匪報庶良藥。則此二語乃昉答劉孝綽詩。非別舉詩也。此傳誤。

廿二史考異卷三十六

南史二

王弘傳

子錫嗣。卒。子僧亮嗣。僧亮弟僧衍。僧衍弟僧達。據此文。似僧達爲錫之子。今以前後勘校。則僧達實弘之少子。與錫昆弟行。其證有五。僧達傳。文帝欲以爲秦郡吏部郎。庾仲文曰。弘子不宜作秦郡。一證也。僧達答詔曰。亡父亡祖。司徒司空。謂祖珣爲司徒。父弘爲司空。二證也。僧達欲誘族子確殺而埋之。從弟僧虔知其謀。禁呵乃止。僧虔。曇首子。而僧達。弘子。故稱從弟。三證也。僧達傳云。兄錫質訥。乏風采。又云。與兄錫不協。四證也。蔡興宗傳云。王錫妻范。以書讓錫弟僧達。五證也。南史本文當云錫弟僧達。校書者誤。以僧排行。妄改錫爲僧衍耳。或又疑僧亮僧衍亦弘之子。今檢宋書。稱僧達爲弘少子。而僧亮爲錫子。嗣父爵。齊受禪。降爵爲侯。休文生于宋代。其述王氏家世。必不舛誤。而僧衍之孫沖。南史稱爲弘玄孫。則僧衍與僧亮均爲弘孫。與僧達非昆弟行矣。晉人如羲之。獻之。父子不嫌同名。卽如王徽亦弘之從子。微弟名僧謙。而微兄子卽名僧祐。豈可妄意有僧字者。卽皆昆弟乎。

王籍傳

梁天監中爲輕車湘東王諮議參軍。隨府會稽郡。按梁元帝紀失載都督會稽事。梁書元帝紀初爲寧遠將軍會稽太守。不云爲輕車將軍。亦史之闕也。考隋書百官志。梁置一百二十五號將軍。輕車在十四班。寧遠在十三班。蓋由寧遠進號輕車矣。

王儉傳

昇明二年爲長史兼侍中。按晉宋以來三公儀同三司及都督軍事者俱有長史。長史之名雖同而品秩輕重各別。諸列傳除長史者必繫本府名。在內如太尉左右長司。司徒左右長史。在外如鎮西長史。輔國長史之類。未有單稱長史者。儉自司徒右長史出爲太守。還爲黃門郎。轉吏部郎。已非長史之職。昇明初遷長兼侍中。長兼者未正授之稱。晉書劉隗傳。太興初長兼侍中。孔愉傳。長兼中書令。是長兼之名自晉已有之矣。南史添一史字。試問儉所授者何府之長史乎。此傳前後多有長史字。當由後人轉寫相涉而誤。非延壽本文也。南齊書本無此字。或轉據南史增益之。不獨昧於官制。亦大非闕疑之旨。

趙充國猶能自舉西零之任。西零卽先零。西先聲相近。

遺詔以儉爲侍中尚書令鎮軍。鎮軍下當有將軍二字。下文云進號衛將軍。謂由鎮軍將軍進衛將軍也。

王僧傳

父曇首與兄弟集會子孫任其戲適僧虔累十二博基既不墜落亦不重作僧綽採蠟燭珠爲鳳凰僧達奪取打壞亦復不惜伯父弘曰僧虔必至公僧綽當以名義見美或云僧虔採燭珠爲鳳皇弘稱其長者云按延壽史多采雜書或兩說異同亦兼存之此後一說出蕭子顯書也本傳高帝與僧虔賭書畢謂曰誰爲第一對曰臣書第一陛下亦第一帝笑曰卿可謂善自爲謀或云帝問我書何如卿答曰臣正書第一艸書第二陛下艸書第二而正書第三臣無第三陛下無第一前一說出蕭子顯書劉璉傳與友人會稽孔邊同舟遇一女子邊目送曰美而豔璉曰斯豈君子所宜言乎非吾友也于是解裳自隔或曰與友孔徹同舟入東徹留觀岸上女子璉舉席自隔不復同坐後一說出蕭子顯書王茂傳人或譖茂反遣視其甲稍則塵綱焉乃誅譖者或云茂與帝不睦帝諸腹心多勸除之而茂少有曉命帝又惜其用乃命腹心鄭紹叔候之云云此兩說姚思廉史皆無之張纘傳嘗預東宮盛集太子戲纘曰丈人謚聿皆何在纘從容曰纘有謚聿亦殿下之衡定或云纘從兄聿及彌恚短湘東王在坐問纘曰丈人二從聿彌藝業何如纘曰下官從弟雖竝無多猶賢殿下之有衡定此兩說思廉書亦無之

王志傳

志家居建康禁中里馬糞巷馬糞梁書作馬蕃

王藻傳

謝莊殆自害於矐叟。殷沖幾不免於強鉏。按謝莊傳無尙主事。疑謝殷二人一以目疾辭。一以足疾辭。

遂停尙主也。

姆妳爭媚。

按南史多俗語。如呼父爲爹。

梁始興王憺傳音徒我反。

又爲阿爺。

侯景傳。

呼乳母爲妳。

王藻傳。

布施爲觀。

張融傳。

舉移爲擱。

齊東昏侯紀。

之類。字之俗者如籛爲鑷。

齊鬱林王紀。范蔚宗隱逸傳。

盤爲杵。

劉穆之傳。

吝爲慳。

何敬容傳。

樵爲藁。

朱百年傳。

熏爲燠。

侯景傳。

是也。

王亮傳

下官以犯諱被代。未知明府諱。若爲攸字。當作無骹尊。傍犬爲犬。傍無骹尊。若是有心攸。無心攸。乞告示。

予謂無骹尊者。曾也。曾傍犬爲獸。犬傍曾爲猶。有心無悠。無心爲攸。攸悠獸猶四字同紐同音。亮父

名攸。贖之伴爲不知。問是何字。頻觸其諱。且以犬傍戲之也。世俗讀攸悠二字如憂音。而史文遂難通

矣。

王華傳

及王宏輔政。而宏弟曇首爲文帝所任。與華相埒。華常謂己力用不盡。每歎曰。宰相頓有數人。天下何由得安。考是時王宏以侍中司徒錄尙書事。固是三公之職。曇首以侍中領驍騎將軍。華以侍中領護

軍將軍而華稱宰相。頓有數人。劉湛傳。湛爲侍中時。王華、王曇首、殷景仁亦爲侍中。文帝曰。此四賢一時之秀。同管喉舌。恐後世難繼。沈演之傳。演之爲右衛將軍。范蔚宗爲左衛將軍。對掌禁旅。同參機密。尋加侍中。文帝謂之曰。侍中領衛。望實華顯。此蓋宰相便坐。卿其勉之。似當時以侍中爲宰相矣。然同時如范泰、王球輩亦爲侍中。而時人未以宰相目之。則知侍中之職。雖爲清切。亦視人主倚任何如耳。孝武選王彧、謝莊、阮韜、何偃四人爲侍中。初未預參機密。官職之隨人重輕。自昔然矣。

子定侯嗣。卒。子長嗣。按王僧綽傳云。王華子新建侯嗣才劣。位遇亦輕。則嗣乃華子之名。此云定侯嗣。似定侯爲其名矣。

王琨傳

出爲會稽太守。加都督。坐誤竟囚。降爲冠軍。按南齊書本傳。出爲督會稽、東陽、新安、臨海、永嘉五郡軍事。左軍將軍。會稽太守。坐誤竟囚。降號冠軍。蓋自晉以後。都督必帶將軍號。而軍號又有高下之分。琨本以左軍將軍督會稽五郡。坐事降號冠軍將軍。而督軍如故。齊史所書本甚分明。今刪去左軍將軍一語。而降爲冠軍之文。不可通矣。予嘗謂延壽似未通南北朝官制。故諸傳刪省。多未得其要領。此類是也。

王儉爲宰相。屬琨用東海郡迎吏。按當時州郡除代。皆有迎吏。謝述傳。宋武帝臨豫州。諷中正以爲迎

主簿。王規傳。爲本州迎主簿。到洽傳。年十八。爲徐州迎西曹。江綰傳。南康王爲徐州。召爲迎主簿。劉孺傳。本州召迎主簿。王詵傳。沈曇慶爲徐州。辟詵爲迎主簿。又爲州迎從事。徐勉傳。舊揚徐首迎主簿。盡選國華中正。以勉子崧充南徐選首。蔡徵傳。陳武帝爲南徐州。召補迎主簿。隋書百官志。陳依梁制。年未滿三十者。不得入仕。唯諸州光迎主簿。西曹。左曹得仕。其諸郡唯正王任丹陽尹。經迎得出身。庶姓尹則不得。可證迎吏亦入官之一途也。謝方明自晉陵太守遷南郡相。而景陵送故主簿宏季咸。徐壽之竝隨在西。宋孝武去鎮。顏師伯以主簿送故隨。王子隆自荊州代還。以庾於陵爲送故主簿。則當時又有送吏矣。

王景文傳

以景文及會稽孔顛俱南北之望。按琅邪王氏雖僑居江南。猶自稱北人。而以三吳人士爲南士。張緒善談玄。王儉云。緒過江所未有。北士可求之耳。齊高帝欲用緒爲右僕射。王儉曰。南士由來少居此職。裴松之傳。琅邪王茂之。會稽謝輜皆南北之望。竝以南北對舉。其時南人仕宦多不達。不如北士之通顯也。

王績傳

景文封曲阜侯。績襲其本爵。爲始平縣五等男。按景文傳云。封江安縣侯。非曲阜也。本爵之語。亦未詳。

景文初襲伯父封建陵子，非始平男。

王通傳

仕梁爲黃門侍郎。按通弟質以帝甥甲□亭侯，固以帝甥封莫□亭侯，俱載本傳，惟通封武陽亭侯，不書，此例之不一也。

王秀之傳

秀之祖父敬弘致仕，隱吳興。敬弘居餘杭之舍亭山，餘杭，吳興屬縣也。

王鎮之傳

爲征西道規司馬、南平太守。道規上當有劉字，道規以征西將軍、都督荊州，鎮之爲其府司馬，而帶南平太守也。南平郡屬荊州。

王晏傳

初爲建安國左常侍，稍至車騎。按稍至車騎四字，文義難曉。考齊書本傳云：宋大明末，起家臨賀王國常侍員外郎、巴陵王征北板參軍、安成王撫軍板刑獄，隨府轉車騎，蓋晏初仕臨賀國常侍，再任巴陵王府參軍，又任安成王府刑獄參軍也。安成王即宋順帝初除撫軍將軍、揚州刺史，晏在府板授撫軍刑獄參軍。元徽二年，王進號車騎將軍，即授車騎刑獄參軍，所謂隨府轉也。今刪去安成王撫軍板刑獄一

語又改隨府遷爲稍至。而文理難通矣。齊史云臨賀國。此云建安國。亦當以臨賀爲是。宋孝武大明七年立第十八皇

子子產爲臨賀王。

王思遠傳

臨海太守沈昭略。按昭略傳不云爲臨海太守。

王准之傳

范泰嘲之。卿唯解彈事耳。准之正色答。猶差卿世載雄狐。按范蔚宗傳云。素有閭庭論議。朝野所知。故門胄雖華。而國家不與姻。准之雄狐之譏。蓋謂此也。又王僧虔傳。甲族由來多不居憲臺。王氏分支居烏衣者。位宦微減。僧虔爲御史中丞。乃曰。此是烏衣諸郎坐處。我亦可試爲耳。蓋當時甲族薄中丞而不爲。故范泰以唯解彈事嘲之。

王懿傳

見仲德驚曰。漢已食未。輟耕錄云。今人謂賤丈夫曰漢子。引北史。魏該遷青州刺史。固辭。文宣帝大怒。曰。何物漢子。與官不就。據此傳。則晉時已有漢之稱。亦非賤詞也。

到搆傳

隨王子隆帶彭城郡。搆問訊。不修部下敬。爲有司舉。免官。按三國志。秦宓與太守夏侯纂書稱。民請爲

明府陳其本紀。晉人法帖多有自稱民者。劉攜彭城武原人。於彭城守當修民敬。南史避唐諱。故改稱部下。劉凝之傳。臨川王義慶。衡陽王義季。鎮江陵。竝遣使存問。凝之答書曰。頓首稱僕。不爲百姓禮。人或譏焉。亦是避諱改民爲百姓也。

到沆傳

武帝宴華光殿。命羣臣賦詩。獨詔沆爲二百字。按是時被詔賦二十韻詩者。尙有任昉、蕭琛、到洽三人。

見洽傳。不得云獨也。

垣崇祖傳

元凶弑逆。嗣輔國將軍張柬。嗣字誤。當是隸字。

袁粲傳

粲剋日謀。矯太后。令韞伯興率宿衛兵。攻齊高帝于朝堂。回率軍來應。彥節。彥節劉秉字也。南史避唐諱稱字。候伯等竝

赴石頭事泄。按宋書粲傳于竝赴石頭之下。云本期夜發。其日秉恆擾不知所爲。晡後便束裝。未暗

載婦女席卷就粲。由此事泄。南史刪去二十九字。詞意未足。而下文王蘊聞彥節已奔句。亦無根矣。

袁昂傳

昂字千里。雍州刺史顓之子也。雍州刺史四字可省。

袁泌傳

臨終戒其子芳華。袁廷構曰：陳書作蔓華。

孔靖傳

累遷吳興太守，加冠軍。冠軍下當有將軍二字。

褚彥回傳

嫡母吳縣主求之。吳縣當作吳郡。

領尚書、右衛將軍。按彥回在明帝時嘗爲吏部尚書及右僕射。此云領尚書，則當時無此官也。

後爲吳郡太守。吳郡當作吳興。南齊書本傳及王儉碑文俱無守吳郡事。蓋傳寫之譌。下文亦有出爲

吳興之語。

彥回初爲丹陽，與從弟炤同載。按南齊書本傳：明帝卽位，轉侍中，遷散騎常侍，丹陽尹，延壽刪去遷丹

陽尹一節，則此語無根。

又詔彥回妻宋故巴西主。按王儉撰淵碑文云：選尚餘姚公主。此傳前云尚南郡獻公主，後云巴西主。

蓋初封餘姚公主，進封南郡，齊受禪後，又例降封巴西，封號雖異，其實一人也。

褚綦傳

八年改封巴東郡侯。按彥回本封南康郡公。秦初襲父爵。至是以南康爲王國。而改秦爲巴東公。見齊武帝諸子傳。此云郡侯。恐誤。

蔡興宗傳

廬江內史周朗以正言得罪。周朗傳作廬陵內史。

三吳舊有鄉射禮。元嘉中。羊元保爲吳郡行之。久不復脩。興宗行之。是時興宗爲會稽太守。三吳謂吳

郡。吳興會稽也。

本水經注。

王鎮之傳。時三吳饑荒。遣鎮之銜命賑卹。而會稽太守王愉不奉符旨。會稽在三

吳之中明矣。

元嘉初中。書舍人秋當詣太子詹事王曇首。不敢坐。按列傳卷廿二以爲張敷事。彼傳秋作狄。字之譌

也。廣韻秋字注。又姓。宋中書舍人秋當。

宋書興宗傳亦譌作狄。

其後。中書舍人宏興宗爲文帝所愛遇。上謂曰。卿欲作士人。得就王球坐。乃當判耳。按球傳云中書舍

人徐爰。不言興宗。亦無就坐舉扇事。

太原孫敬玉。位至尙書右丞。子廉。仕梁。以清能。位至御史中丞。按循吏傳有孫廉。亦爲御史中丞。其父

名奉伯。東莞人。此別一孫廉。

外甥袁顓。始生子象。而妻劉氏亦亡。興宗姊卽顓母也。按袁象爲顓弟。說之子。此兩顓字當作說。因前

文有外甥袁顓相涉而譌耳。顓與顓爲親兄弟，則顓母卽顓母。顓顓皆爲興宗甥，無可疑者。此後人傳寫之譌，非史家之失也。宋書興宗傳 謾與此同

何尙之傳

義宣司馬竺超。按南郡王義宣、張暢、暢子融傳俱作竺超人。考宋書本名超民，南史避唐諱，或改民爲人，或去下一字。

何點傳

吳國張融少時免官。按上文已有吳國張融，此又舉其望，重複非法。何子季傳，汝南周顓前後兩見，伏唯傳前稱樂安任昉，後稱樂安任遙，遙子昉，一篇之中，再舉郡望，何不檢照乃爾。

何昌寓傳

父修之位侍中。此別是一人，非儒林傳之修之也。

張岱傳

母年八十，籍注未滿，岱便去官，從實還養。按何子平傳，母本側庶，籍注失實，實未及養，而籍年已滿，便去職歸家，顧說之謂曰：尊上年實未滿八十，親故所知，州中差有微祿，當啓相留。據此文，則古者父母年八十，有歸養之令也。

張緒傳

常云何平叔不解易中七事。此文似未完。南齊書云何平叔所不解易中七事。諸卦中所有時義。是其一也。緒舉斯語。必有所為。二史文皆簡略。無以知之。三國志注引管輅別傳云何尚書自言不解易九事。南史伏曼容傳亦云何晏疑易中九事。此云七事。未許孰是。子完。南齊史作克。

張瓌傳

宋征北將軍南兗州刺史永之子也。宋征北以下十字可省。

安陸王綽臨雍州。綽與緬同。

張稷傳

山賊唐寓之作亂。梁書作唐瑤。梁宗室傳作唐瑤。瑤誤之。瑤誤為瑤也。

封江安縣子。梁書作江安縣侯。

張邵傳

初為晉琅邪內史王誕龍驤府功曹。按王誕傳不云為龍驤將軍。史之漏也。

張暢傳

隊主張世營救得免。卽張興世也。本單名世。

張沖傳

以沖爲舒州刺史。按齊無舒州。舒當作郢。

張融傳

四月八日建齋并灌佛。僚佐餽者多至一萬。餽與覲同。廣韻。覲。施也。

荀伯子傳

故太尉廣陵公陳淮。淮當作準。

裴子野傳

沈約所撰宋書稱松之已後無聞焉。今宋書無此文。蓋與子野釋恨之後。改去之耳。

沈懷文傳

爲治書侍御史。南史避唐高宗名。故治書侍御史。此文後人所添。梁本紀。道賜位南臺。

治書侍御史。亦後人所添。

周捨傳

於是勉捨同參國政。兩人俱稱賢相。按徐勉官至尙書僕射。中書令。固可稱宰相。周捨官止太子右衛。

率右衛將軍及太子詹事而亦得賢相之稱。蓋當時宰相無常職。惟預機密者。便得稱之。其真拜三公及儀同三司者。班秩雖高。未必預聞國政也。

周弘正傳

弘正諂附王偉。又與周石珍合族。避景諱。改姓姬氏。按弘正爲侯景太常。改氏爲姬。固於行檢有玷。然當時受僞命者。豈獨弘正一人。至於諂附王偉。與周石珍合族。則或者傳聞已甚之辭。南史所采異聞。如梁臨川王宏與武帝女永興主私通。遂謀弑逆。陳後主通蕭摩訶之妻。蕭韶爲幼童。庾信愛之。有斷袖之歡。北史辛德源與裴讓之相愛。兼有龍陽之重。祖珽飲酒。藏銅壘二面。皆舊史所無。未可盡信。北齊

書祖珽傳已亡。後人以北史補入。

庾仲文傳

始興王濬當鎮湘州。以仲文爲司馬。濬不之任。仍除南梁太守。司馬如故。按仲文爲濬後軍司馬。濬不之湘州。改除南豫州。故仍以司馬領南梁太守。南梁。豫州屬郡也。史但云濬不之任。不云移鎮南豫。則無緣遙帶南梁郡守矣。此亦延壽不諳官制之一證。

顧覲之傳

嘗於文帝坐論江東人物。言及顧榮。袁淑謂覲之曰。卿南人怯懦。豈辦作賊。覲之正色曰。卿乃復以忠義

忠人淑有愧色。按袁氏世無失德。淑後來又以忠義著。何愧之有。此事出宋書本傳。休文南人。左袒鄉先達。故載斯語。然史家不分皁白。大率如此。

羊戎傳

官家恨狹。更廣八分。按八屬重唇。分屬輕唇。而配爲雙聲。下文銅池搖颺句。銅屬舌頭。池屬舌上。而亦配爲雙聲。今人所謂類隔也。凡雙聲必依其類。今所傳字母者。聲之類也。字母三十六字。唐以後始有之。然六朝人精於雙聲。當時必自有譜。僧守溫輩竊而名其學。鄭漁仲不考其本末。妄謂字母出於梵音。不知梵音四十二母。與中華之三十六母。迥乎不同也。今以此傳及魏收傳所載雙聲。合之後來字母。官家見母也。恨狹。匣母也。八分。邦母也。清泚。清母也。銅池。定母也。搖颺。喻母也。當得。端母也。劇基。羣母也。愚魏。疑母也。衰收。審母也。是誰。禪母也。鼻平。竝母也。飯房。奉母也。荅籠。來母也。箸札。照母也。嘲玳。知母也。蓋孫炎製反切。沈約辨紐字以來。士大夫多能言之。更溯而上之。則參差。叮嚀。拮据。閒關。詩三百篇隨舉。卽是股肱。阨隙見於尙書。饕餮。窮奇載於左氏。天下之口相似。古今人不相遠也。何待西域沙門。始泄其祕哉。

沈慶之傳

視諸沈爲劫首者數十人。士悉患之。慶之詭爲置酒大會。一時殺之。於是合境肅清。按慶之雖預顧命。

未領揚州刺史又不還鎮鄉郡。所謂合境者。果何指乎。此事宋書所無。難以深信。

沈昭略傳

王晏嘗戲昭略曰。賢叔可謂吳興僕射。賢叔謂文季也。上文未見文季事。則此語無根。且吳興僕射之嘲。亦見文季傳。而答語各異。若以此段并入文季傳。則詞不費而意亦顯矣。

宗支傳

祖少文名列隱逸傳。宗之支大父少文名列隱逸。不與愨支合傳。沈初明之大父瑀。名列循吏。不與初明合傳。皆與全書體例不相應。

劉悛傳

夏侯恭叔上書。以柳元景中興功臣。劉勔殞身王事。官存封爵。詔以與運隆替。不容復厝意也。此事又見垣崇祖傳。

劉繪傳

爲晉安王征北長史。南海太守。行南徐州事。南海當作南東海。脫東字。

劉孝綽傳

武帝謂舍人周捨。按周捨傳不言除舍人。據梁書。蓋爲中書通事舍人。

劉孝儀傳

出爲豫州內史。豫州疑豫章之誤。

齊宗室傳

臨汝侯坦之。少帝微聞外有異謀。此少帝謂鬱林王也。王元謨傳稱宋前廢帝爲少帝。桓康傳稱後

廢帝爲少帝。江淹傳前稱宋蒼梧王爲少帝。後稱齊鬱林王爲少帝。宗支傳亦稱鬱林王爲少帝。與紀傳稱謂互異。

左將軍沈約。五更初聞難。馳車走趨西掖門。按沈約傳。齊時爲左衛將軍。不爲左將軍。

齊高帝諸子傳

始興王鑑。初封廣興郡王。後改封始興。廣興卽始興郡。宋明帝改始爲廣。齊初仍復故名。非改封也。齊武帝諸子傳

廬陵王子卿。徙都督荊州刺史。始興王爲益州子卿解督。按齊書本云都督荆湘益寧梁南北秦七

州。則益州在所督之內。其云解督者。特解益州。非去都督之號也。南史旣刪所督諸州之名。則解督一節。亦可從省。

明帝諸子傳

邵陵王寶修。中興二年謀反。宣德皇后令賜死。按梁武誅齊宗室。誣以反謀。齊書修于梁代。目爲謀反。不得不爾。延壽不當仍以反目之論。望其擇位扶危。擇當作釋。

陳顯達傳

後以太尉判鄱陽郡公爲三公事。而職典連率。人以爲格外三公。按宋齊之世。三公出典方州者多矣。非始于顯達也。五等封爵無判事之職。云判鄱陽郡公亦非也。齊史本無此文。延壽采自它書。殊未可信。

焦度傳

父明。與千餘家隨居襄陽。乃立天水郡略陽縣以處之。此卽宋志雍州之南天水也。彼志失書建立之年。隋志襄陽郡上洪縣。宋僑立略陽縣。梁又立德廣郡。然則梁之德廣郡卽宋之南天水矣。

周盤龍傳

永明五年爲大司馬。此時豫章王嶷爲大司馬。盤龍何以得代之。蓋爲嶷府之僚佐。史脫其文耳。

胡諧之傳

卒諡肅侯。按齊書諧之爵關內侯。故諡稱肅侯。此刪去爵關內侯句。則侯字無根。

陸慧曉傳

婦父領選始作尚書郎。按婦父謂張岱也。子倕稱岱爲外祖可證。

遷西陽王征虜、巴陵王後軍、臨汝公輔國三府長史、行府州事。按西陽王子明、永明六年除冠軍將軍、南兖州刺史。八年進號征虜、臨汝公昭文。永明十年除輔國將軍、南豫州刺史。巴陵王子倫以永明七年除南中郎將、南豫州刺史。此云後軍不同。蓋軍號遞遷。史家不能悉書也。

陸襄傳

殺廣晉令王筠。此別一王筠。

庾杲之傳

嘗兼侍中夾侍。柳世隆謂齊武帝曰：「庾杲之爲蟬冕所映，彌有華采。」陛下固當與其卽眞。此兼字當讀去聲。蓋假職未眞授之稱。與一人兼兩職之兼有別。舊唐書職官志：「職事解散，官欠一階不至，爲兼。其兩職事者，亦爲兼。頗相錯亂，其欠一階之兼，古念反。其兩職事之兼，古恬反。字同音異耳。」

劉懷珍傳

伯父奉伯。宋世位至陳南頓二郡太守。按下文懷慰傳又云：「祖奉伯，宋元嘉中爲冠軍長史，蓋以長史帶郡守也。然一篇之中前後重出，當刪此而存彼。」

庾肩吾傳

北地傅弘、東海鮑至等。按上文已有鮑至名。此又舉其郡望。於史例未當。

劉虬傳

表虬及同郡宗測、宗尙之、庾易、劉昭五人。按上文已云同郡宗測。此文重見。庾易、新野人。劉昭、平原人。又不當蒙上同郡之文。

廿二史考異卷三十七

南史二

梁宗室傳上

吳平侯景。祖道賜以禮讓稱。居鄉有爭訟。專賴平之。又周其疾急。鄉里號曰墟王。皆竊言其後必大。仕宋。終於書侍御史。齊末追贈左光祿大夫。道賜卽梁武之祖。其事迹當見於梁本紀。乃別出於吳平侯傳。非史例也。

長沙王懿。至五月。有司方奏追皇考皇妣尊號。本紀有司奏追尊考妣在閏四月。臨川王宏。正立弟正表。封封山侯。後奔樂山。表弟正信。按北史。正表在梁。封山陰縣侯。而梁書。南史俱作封山侯。此北史誤也。樂山二字誤。當云後奔東魏。表上脫正字。

梁宗室傳下

安成王秀。殺豫州刺史司馬懷悅。懷字衍。

鄱陽王範。誰當作天子。艸覆車邊已。範字从竹。不从艸。隸書相溷耳。右旁从已。不从己。童謠多別字。大率如此。

武帝諸子傳

昭明太子。太子以爲疑。命僕射劉孝綽議其事。按。孝綽官太子僕。非僕射也。射字衍。下文屢稱劉僕。

不稱僕射。可證。

豫章王綜。綜改名纘。北史。纘作贊。當從之。綜既自稱東昏子。必不肯與梁武諸兒同从糸旁。

南康王績。天監十年。爲南徐州刺史。按。刺史都督軍事者。必加將軍號。乃得開府置官屬。如長史。司

馬。諮議。參軍之屬。皆以本府號爲稱。王僧孺傳。爲仁威南康王長史。以績鎮南徐州時。加仁威將軍也。

僧孺又爲北中郎諮議參軍。其時亦在績府。以北中郎將領南兗州刺史也。傳於仁威將軍。北中郎將

之號。皆削而不書。而僧孺傳之文。遂難通矣。南史於刺史軍號。什去其七八。或并不書都督。於例皆未

畫一。不如姚思廉書之詳善。略舉一條。餘可類推。

邵陵王綸。復歸齊昌。行收兵至汝南。按。隋書地理志。安陸郡之吉陽縣。梁立汝南郡。卽此傳之汝南。

非漢晉之汝南也。

及廬陵之沒。綸。觥望滋甚。於是伏戎于莽。用伺車駕。按。邵陵以險躁專殺。再致削爵。然思廉書初不言

其曾有逆謀。南史始於傳末及之。其實全不可信。綸卽有觥望。當在免官奪爵之日。若廬陵之薨。在太

清元年。其時綸方鎮南徐。中大同元年。綸由丹陽尹除南徐州刺史。至太清二年。始移州未行。而侯景難作。南史俱失書。竝無失意之事。廬陵又非

以罪死。何故使生觥望。若云廬陵既沒。以次當立。當先謀害東宮。豈宜輒行構逆。此情理所必不然者。思廉論於邵陵。雖譏其險躁。仍嘉其忠孝。豈有謀逆之人。而晚節乃存忠孝者乎。延壽好采它書。而不察事理之有無。其失往往如此。

簡文諸子傳

尋陽王大心。幼而聰明。善屬文。按御覽引三國典略云。大心小名英童。與大器同年。十歲竝能屬文。嘗雪朝入見。梁武帝詠雪。令二童各和。並援筆立成。此事姚李二史皆失載。

汝南王大封。魏剋江陵。遇害。按梁書無大封傳。北史蕭大圓傳云。于謹軍至。元帝乃令大封充使。大圓副焉。其實質也。周保定二年。大封爲晉陵縣公。是江陵陷後。大封初未遇害。南史元帝紀云。汝南王大封。尚書左僕射王褒以下。竝爲俘。以歸長安。與北史小異。亦不云被害。蓋延壽雜采它書。傳聞異詞。彼此多不相照也。

曹景宗傳

臘月。於宅中使人作邪許。逐除。邪許。梁書作野虜。野虜卽邪許之轉聲。

鄧元起傳

初元起在荊州刺史。隨王板元起爲從事。別駕庾華堅執不可。按庾華傳。梁州人益州刺史鄧元起。功

勳甚著。名地卑瑣。始興忠武王憺為州將。元起位已高。而解巾不先州官。則不為鄉里所悉。元起乞上籍出身州從事。華不從。與此傳事略同。而一云隨王。一云始興王。當有一誤。考始興鎮荊州。即梁武兵人建康之日。華既為荊州別駕。無緣復在都城內。且華以天監元年卒。其時方為會稽行事。則任別駕必在齊代。此傳以為隨王子隆板授從事者。蓋得之。但永明之世。元起未為益州刺史。功勳初不甚著。又籍隸南郡當陽。非梁州人。華傳所云。皆失其實。

庾子輿傳

巴東有淫預石。淫預即豔預也。淫豔聲相近。後人又加水旁。

呂僧珍傳

東海范陽人也。梁書無陽字。按東海固不得有范陽縣。而考之宋志。范縣亦隸東平。非東海也。漢志范縣屬東

郡。

沈約傳

轉加建威將軍。河東太守。此河東郡屬荊州。與上文河東太守據蒲坂者各一地。宋書州郡志。南河東郡。晉征西將軍庾亮以司州僑戶立。去州水一百二十者。即此河東也。隋志。松滋縣。江左舊置河東郡。永初三年卒。少子璞嗣。按宋書自序。林子封漢壽縣伯。子邵嗣。邵卒。子侃嗣。侃卒。子整。應襲爵。齊受禪。

國除是璞未嘗嗣林子之封也。南史誤。

其制自序大略如此。此篇首全用沈約自序。蓋仿漢書司馬遷、揚雄傳之例。愚意當以沈田子、林子標目。與王鎮惡諸人同卷。而以約衆附之。乃合本書之體例。

又爲征西記室。帶關西令。關西當作厥西。

南郡范雲。郡當作鄉。

進號征虜將軍。南河清太守。河清當作清河。

謝玄暉善爲詩。任彥昇工於筆。約兼而有之。謝任二人稱字不稱名。非史法。

范雲傳

南鄉舞陰人。晉平北將軍汪六世孫也。按范泰傳云順陽人。泰爲汪之孫。雲爲六世孫。而籍貫互異者。

南鄉卽順陽。梁代避諱改名也。以南史之例言之。雲亦當類敍於泰傳之後。

孫伯翳。太原人。按上文已云太原孫伯翳。此又云太原人。未免重複之病。

韋叡傳

賊已至城下。方復求軍。梁書此下有臨難鑄兵。豈及馬腹二句。詞意乃足。

初帝勅景宗曰。韋叡卿鄉望。宜善敬之。按景宗。新野人。韋爲京兆望族。與新野遠不相及。而云鄉望者。

晉南渡後，僑立京兆郡於襄陽西界，因以襄陽爲雍州，割南陽、新野諸郡屬焉。故有鄉望之目。景宗傳亦云爲人自恃尙勝，雖公卿無所推，唯以韋叡年長，且州里勝流，特相敬重。

載弟鼎。按韋鼎在隋書藝術傳，當依姚僧垣父子、徐文伯祖孫之例，以鼎別入北史。僧垣在北史，子察在南史，徐文伯在北史。

南史孫之若吳明徹、裴忌之徒，兵敗被執，周隋雖嘗縻以官爵，實與閒廢無異。其事迹具在南朝，又不可闕而不書。延壽列諸南史，自爲允當，未可以一偏之見輕議也。

江淹傳

齊受禪，復爲驃騎豫章王記室參軍。梁書作驃騎建安王記室，帶東武令。考是時豫章王嶷爲驃騎大將軍，都督揚南徐二州諸軍事，淹爲其府記室，因帶東武令。東武屬南平昌郡，正在南徐州部內。梁書作建安王者，蓋轉寫之譌。延壽所見本尙未誤也。但南史於記室參軍下，別敘掌國史事五十餘言，乃云又領東武令，參掌詔策，則失其倫次矣。當時府僚無不帶守令者，南史諸傳中，芟去幾什之六七。此又不書於記室參軍之下，似東武令別一清要之職者，殊可深怪。予嘗譏李氏昧於官制，證之此傳益信。

王儉嘗謂曰：卿年三十五，已爲中書侍郎。按淹以天監四年乙酉卒，溯其生年，當在宋元嘉二十一年甲申。計齊受禪之歲，已三十有六矣。又閱二三年，乃遷中書侍郎，不得云年三十五也。此語不載於梁

史延壽別采它書益之。未可盡信。

襄陽人開古冢。得竹簡古書。字不可識。王僧虔善識字體。亦不能諳。直云似是科斗書。淹以科斗字推之。則周宣王之簡也。按王僧虔傳。雍州有盜發古冢。獲竹簡書。以示僧虔。云是科斗書。考工記。周官所闕文也。此卽一事。而傳聞互異。齊梁之世。雍州治襄陽。非兩地也。

爲宣城太守時罷歸。按淹爲宣城太守。在齊明帝時。南史於上文旣刪去出守一節。則此語無根。

王僧孺傳

魏衛將軍肅八世孫也。曾祖雅。晉光祿大夫。儀同三司。按晉書。雅爲肅之曾孫。而僧孺又雅之曾孫。并肅數之。似止七世。予以三國志注引晉諸公贊推之。則肅子虔。虔子隆。隆子景。景子雅。雅實肅之玄孫。自肅至僧孺。正是八世。晉書偶誤爾。

祖準之。宋司徒左長史。晉書作散騎侍郎。琅邪王氏亦有準之。或作准之。避宋順帝諱。姓名同而望各異也。

侍郎金元起欲注素問。金當作全。

徐勉傳

慧日、十住等旣應營昏。慧日、十住當是兩子小字。十住疑卽悌也。悌嘗爲晉安內史。故云近修東邊兒孫二宅。乃藉十住南還之資。

聞汝所買湖熟田地甚爲烏鹵。湖熟梁書作姑熟。當以湖熟爲正。漢時丹陽郡有湖熟縣。今上元縣南五十里。地名湖熟。卽漢故城所在。

陳慶之傳

時魏濟陰王元徽業。徽當作暉。

蘭欽傳

中昌魏人也。按齊魏二志未見中昌魏之名。

徐陵傳

後主銜之。至是諡曰章僞侯。按陳書諡曰章。無僞字。周書諡法篇亦無以僞爲諡者。恐未足信。

陳宗室諸王傳

方秦。上曰不承則叵測。叵當作上。

岳陽王叔慎。隋遣內陽公薛胄爲湘州刺史。內陽陳書作中牟。考之武史薛胄傳。胄襲封文城縣公。

亦未嘗爲湘州刺史。當有一誤。

義陽王叔達。武德中位侍中。封江國公。歷禮部尙書。卒。按褚亮歐陽詢虞世南姚思廉之徒。雖名見

南史。而不言唐官。惟陳後主太子深云武德初爲祕書丞。卒官。及叔達此傳耳。

黃法𨾏傳

梁元帝承制授交州刺史資領新淦縣令。按梁末增置之州多而刺史資亦輕。又遙授非實土。故有以刺史資而領郡者。程靈洗以譙州刺史資領新安太守。徐世譜以衡州刺史資領河東太守是也。法𨾏以刺史資領縣令。又異數矣。

錢道戢傳

封永嘉縣侯。陳書作永安。

駱文牙傳

駱文牙。陳書無文字。

封臨安縣侯。陳書作常安。

宗元饒傳

時合州刺史陳襄。襄、陳武帝從子。封鍾陵縣侯者。

謝岐傳

弟嶠。篤學爲通儒。按謝嶠仕陳爲國子祭酒。撰爾雅音。見陸氏經典釋文。隋書經籍志又有謝嶠喪服義十卷。

循吏傳

杜驥。亡高祖因晉氏喪亂播遷涼土。按坦與驥爲昆弟。上文云曾祖耽避難河西。此云亡高祖播遷

涼土。前後互異。

虞愿。出爲晉安太守。晉安當作晉平。

儒林傳

伏挺。父友樂安任昉。按挺父暄傳已書樂安任昉。則此樂安字當省。韋放傳稱吳郡張率。其子粲傳

又稱吳郡張率。亦當省去其一。

沈文阿傳

春秋禮記孝經論語義記七十餘卷。陸元朗云。梁東宮學士沈文阿撰春秋義疏。闕下秩。陳東宮學士

王元規續成之。

文學傳

宋史不立文學傳。按宋書無儒林文苑之目。齊書有文學而無儒林。故延壽史儒林自梁始。文學則宋

世竟無一人。皆承襲舊史。無所增益。竊謂宋之文士無過謝顏。既各有專傳。若鮑照之詩賦。山謙之蘇

寶生。徐爰之史。皆一時作者。以冠文苑。良無愧詞。而延壽未見及此。錄錄因人。是可怪也。

高爽。孫抱。東莞人。父廉。吳興太守。按孫廉名見循吏傳。彼傳載高爽作履謎事。若移入此傳。則事類相比。而文亦可省。且亦爲良吏隱惡也。

賈希鏡。祖弼之。晉員外郎。父匪之。驃騎參軍。按王僧孺傳言。晉太元中。員外散騎侍郎平陽賈弼。篤好簿狀。弼子太宰參軍匪之。匪之子長水校尉深。世傳其業。希鏡卽深字也。本名淵。史家避諱。或舉其字。或易爲深耳。彼傳單名弼。此云弼之。亦小異。

劉昭。祖伯龍。官至少府卿。按孝義傳。伯龍嘗爲盱眙太守。

昭集後漢同異。以注范蔚宗後漢。世稱博悉。按宣卿本注范史。范史無志。乃借司馬舊志注以補之。傳云集注後漢一百八十卷。合司馬志言之也。隋志後漢書一百二十五卷。梁剡令劉昭注。卷數與此不同。自章懷改注。而劉注失傳。惟續志三十卷。則章懷以非范氏譌。故不注。而劉本遂流傳到今。鍾嶸。時居士。何子季築室若邪山。山發洪水。漂拔樹石。此室獨存。元簡令嶸作瑞室頌以旌表之。此事已見子季傳。但據彼傳。則室當在秦望山。非若邪山也。

何思澄。每宿昔。作名一束。曉使命駕。名謂名刺。漢魏人所謂爵里刺也。

孝義傳上

郭原平。太守蔡興宗臨郡。以私米饋原平。及山陰朱百年妻。各百斛。原平誓死不受。百年妻亦固辭。

按百年妻辭饋米已見隱逸傳此重見

江泌 梁武帝以爲南康王子琳侍讀 梁當作齊

孝義傳下

褚脩 吳郡錢唐人也 褚氏望出河南過江以後多居錢唐裕之彥回傳稱河南陽翟人者舉其望此與伯玉竝稱吳郡錢唐人者據其實也宋文帝言天下有五絕而皆出錢唐褚欣遠模書褚嗣園棋居其二焉今杭州城內有褚家塘相傳遂良宅也

父仲都善周易 隋書經籍志有褚仲都周易講疏十六卷

隱逸傳上

陶潛字淵明或云字深明名元亮 上淵字亦當爲深此後人追改或云以下當云名深明字元亮傳寫偵到耳

江州刺史檀道濟往候之 按道濟爲刺史在宋元嘉初傳書此事於爲鎮軍建威參軍之前先後失次

考宋書無此事延壽采之它書不及檢照年月

雷次宗 子肅之頗傳其業 按隋志梁有禮記義疏三卷宋豫章郡丞雷肅之撰

關康之 河東楊人也世居京口寓居南平昌 按宋書孟懷玉平昌安邱人而世居京口蓋南平昌卽

僑立京口非有兩地

顧歡。吳興鹽官人也。按鹽官縣屬吳郡。不屬吳興郡。陸氏釋文亦云吳郡人。

隱逸傳下

徐伯珍。世呼爲婦人巖。二年。伯珍移居之。二年字於上下文不相屬。疑有誤。

阮孝緒。所著七錄。削繇等一百八十一卷。按隋志。正史削繇九十四卷。七錄十二卷。

陶弘景。以宋孝建三年景申歲夏至日生。按本傳。陶以梁大同二年卒。年八十五。溯其生年。當是元

嘉二十九年壬辰。前後自相矛盾。且史例。諸臣傳亦無書其生年者。

恩倖傳

孝武以來。士庶雜選。如東海鮑照。以才學知名。又用魯郡巢尚之。江夏王義恭以爲非選。按六朝人重

門第。故寒族而登要路者。率以恩倖目之。鮑明遠以才學爲中書舍人。已不免士庶雜進之嫌。徐爰有史才。生平亦無大過。沈休文列諸恩倖。或以修史之嫌。有意貶抑。南史因而不改。殊未得好惡之平矣。杜文謙忠於王室。致命遂志。乃附見茹法亮傳。尤非善善惡惡之義。

廿二史考異卷三十八

北史一

魏本紀一

神元帝。元年歲在庚子。魏文帝黃初元年也。

帝乃告諸大臣爲與晉和親計。四十二年遣子文帝如晉。是歲晉景元二年也。景元、魏常道鄉公年號。

其時晉未受禪也。魏收書晉字皆作魏。此誤。

平文帝。元年歲在丁丑。晉元帝建武元年也。

昭成帝。建國元年。晉成帝咸康四年也。是年歲在戊戌。

聘慕容晃女爲皇后。是時什翼犍自稱代王。其妻不應有皇后之稱。魏史追書之耳。晉書、晃作銑。銑俗字。

劉務桓死。其弟闕頭立。僭僞傳作闕陋頭。

十二月至雲中。旬有二日。皇子寔君作亂。帝暴崩。按晉書苻堅載記。涉翼犍卽什翼犍戰敗遁於弱水。退還

陰山。其子翼圭縛父請降。堅以翼犍荒俗未參仁義。令人太學習禮。以翼圭執父不孝。遷之於蜀。是翼

韃嘗被執至長安。魏史諱而不言爾。延壽生於唐世。無所諱忌。乃不取本朝御撰之書。而仍伯起曲筆之史。是其短也。

道武帝元年。葬昭成皇帝於金陵。自什翼犍被執。道武逃竄賀蘭部。僅得存活。代之無主者九年。魏

收於昭成沒後。即稱道武帝元年。以至九年。誕妄之甚也。北史不當仍之。明人編通鑑綱目前編。以少康始生之歲。即為元歲。蓋

仿魏收之例。然自古未有無國而稱元年者。

登國元年。劉顯遣弟亢泥。后妃傳作亢壑。

三年。慕容垂遣使朝貢。按登國三年四年。再書垂遣使朝貢。亦沿魏收之文。是時拓跋雖自立國。猶臣

屬於燕。乃以燕使至為朝貢。何顏之厚乎。明元永興三年五年。神瑞元年。屢書姚興遣使朝貢。秦於魏

為敵國。亦不當云朝貢。此皆宜改而不改也。

皇始二年。寶弟賀麟。將妻子走西山。賀麟一名麟。晉書後燕載記所謂趙王麟也。劉庫仁傳。後奔慕容麟。麟徒之。中山信僞

傳亦稱趙王麟。

城內共立慕容普鄰為主。晉書載記所謂慕容詳也。

明元帝。母曰劉貴人。按后妃傳云。登國初。納為夫人。未見貴人之稱。

文成帝。母曰閭氏。按后妃傳景穆皇后郁久閭氏河東王毗妹也。郁久閭本蠕蠕之族。太和中改稱閭氏。外戚傳亦但稱閭毗。唯后妃傳稱郁久閭。於史例殊不畫一。

興安元年十一月。皇或作王誤妣閭氏薨。按后妃傳少以才選入東宮。有寵。生文成皇帝而薨。文成即位。追尊號諡。是閭氏之薨。在文成即位以前。紀書於即位之後。自相矛盾。

魏本紀三

孝文帝。太和二十二年正月。拔新野。斬其太守劉忌。南齊書作劉思忌。

魏本紀四

孝明帝。皇曾孫故臨洮王寶暉世子釗體自高祖。寶暉當是京兆王愉之子。愉得罪死。後追封臨洮王。史不言何人嗣王。蓋卽寶暉也。寶暉之子於孝文爲曾孫。故稱皇曾孫。

論。比之漢世安順宣武之後。繼以元成。按延壽史論多襲舊史之文。此篇前半用魏收世宗紀論。後半用肅宗紀論也。世宗論末云。比夫漢世元成安順之儔歟。肅宗論首云。宣武已後。政綱不張。延壽本用其語。後來轉寫。偵到。又爲妄人改竄。文義遂不可通。當依魏書正之。

魏本紀五

永安二年。遷文穆皇帝及文穆皇后神主于太廟。按自古帝王由藩國入繼。雖或追崇本生。未有升祔。

太廟者。元魏孝莊始尊其父爲文穆皇帝。遷主太廟。而以孝文爲伯考。此末季黷禮之事。不足爲訓。魏收錄以爲戒。而論復申言之。以爲高祖不祀武宣享廟。知其福祿之不永。可謂深切著明矣。其時臨淮王彧上表切諫。言漢祖勦業。香街有太上之廟。光武中興。南頓立舂陵之寢。元帝之於光武。疏爲絕服。猶尙身奉子道。入繼大宗。高祖之於聖躬。親實猶子。陛下旣纂洪緒。豈宜加伯考之名。帝竟不納。明嘉靖議禮。正用孝莊故事。永嘉諸臣。猖狂罔忌。識見更出元魏禮官下矣。

文帝。大統元年立妃乙氏爲皇后。后妃傳作乙弗氏。乙弗本複姓。太和中改稱乙氏。乙渾亦稱乙弗。渾見陸麗高允傳。

孝靜帝。天平元年以魏郡、林慮、廣平、陽邱、汲郡、黎陽、東濮陽、清河、廣宗等郡爲皇畿。陽邱當作頓邱。魏志無東濮陽。蓋謂東郡、濮陽郡也。東下脫郡字。

齊本紀上

神武帝。六世祖隱。晉元菟太守。隱生慶。慶生泰。泰生湖。按高湖事無足取。魏收以齊獻武之曾祖。特爲立傳。延壽刪之。是也。但慶泰兩世皆有名位。湖賜爵東阿侯。諡曰敬。皆應敍於紀中。而全不書。則又失之略矣。神武祖謚贈太尉公。諡武貞。父樹生。贈太師。渤海王。諡文穆。亦紀所不應略者。

抵揚州。邑人龐蒼鷹。此揚州縣名。在并州界中。高孝緒封揚州縣開國公。卽此。神武從祖兄子永樂。太昌初封揚州縣伯。進爵。

遠近聞之皆稱高儀同將兵整肅。按上文無除儀同三司一節。則此語爲無根。

遂西剋潼關。執毛洪賓。賀拔勝傳作毛鴻賓。鴻賓亦有傳。鴻洪古通用字也。魏孝武紀亦作洪賓。

齊本紀中

文宣帝。天保元年六月。封司空公潘相樂爲河東王。司空潘相樂爲司徒。六年六月。河東王潘相樂薨。

按本傳樂字相貴。不名相樂。然魏孝靜帝紀齊書文宣紀俱作相樂。

孝昭帝。幼主卽位。乃卽朝班。幼主卽廢帝也。一篇之中。兩稱幼主。一稱少主。一稱廢帝。

周本紀上

文帝。普回因狩得玉璽三紐。文曰皇帝璽。普回以爲天授己。獨異之。按後周之先。出自匈奴宇文。而

紀所述世系。與匈奴宇文莫槐傳互異。紀稱普回子莫那。莫那九世至侯豆歸。爲慕容晁所滅。傳稱莫

槐弟普撥。普撥子邱不勤。邱不勤子莫虜。晉書作莫圭莫虜子遜呢延。晉書作遜呢延父子世雄漠北。又先

得玉璽三紐。自言爲天所相。每自誇大。遜呢延死。子乞得龜立。別部人逸豆歸殺乞得龜而自立。爲慕

容晁所敗。遠遁漠北。自是散滅。兩篇所述人名世系。無一同者。一據周書。一據魏書也。延壽生於唐初。

去周末遠。何以不考。乃爾。

夏州刺史解拔彌俄突。解當作斛。周書齊本紀天平三年神武襲西魏夏州禽其刺史賀拔俄彌突即

此人也。斛賀聲相轉。

都督彌姐元進。彌姐，羌複姓也。見廣韻。

遣儀同李諱。按舊唐書令狐德棻傳德棻嘗從容言於高祖曰陛下既受禪於隋復承周氏祿數國家

二祖功業竝在周時如文史不存何以貽鑒今古此修史之議所由昉也其後德棻專司周書雖不便

爲二祖立傳乃其功績敘述亦復寥寥北史所載大率因周書舊文如是年遣儀同李諱與李弼趙貴

等討曹泥於靈州諱引河水灌之大統四年開府李諱念賢等爲後軍及李諱等至長安李弼傳使持

節太尉柱國大將軍大都督尙書左僕射隴右行臺少師隴西郡開國公李諱王盟傳趙雀之亂盟

與開府李諱輔太子出鎮渭北皆謂李虎也周本紀天和六年以大將軍李諱爲柱國此謂李昞也凡

校書須仍元文周書於李諱字皆改爲虎并天和六年李諱亦作虎則謬妄之甚矣唐書稱周閔帝受

禪虎已卒乃追封唐國公安得至武帝朝且虎在西魏時爲八柱國之一豈待天和中始授柱國乎

恭帝元年魏史柳虬執簡書告於朝曰按宇文泰於孝武躬行弑逆較之高歡之逐君罪又甚焉柳虬

之簡盧辯之誥矯誣詐僞乃王莽大誥之流何足汚史策乎南北史刪改入書凡詔牋賦頌之類多所

芟落然尙有當刪而不刪者如顧歡袁粲佛老之辯徐勉戒子之書劉峻之廣絕交王劭之表符命衛

操之立碑。蘇綽之大誥。皆是也。

孝閔帝。元年正月。天王卽位。史失書卽位之日。據周書。乃辛丑日也。魏恭帝以十二月庚子遜位。次年正月辛丑。周主卽位。蓋月之一日。

明帝。武成元年正月初。改都督諸州軍事爲總管。王懋竑曰。前此都督結銜。皆云都督幾州軍事。某州刺史。北史變其例。云都督某州刺史。取省文耳。自改稱總管以後。史但書某州總管。不云刺史。似結銜亦異於前矣。然考周書。蔡國公廣傳。除秦州總管十三州諸軍事。秦州刺史。齊王憲傳。除益州總管。益寧巴盧等二十四州諸軍事。益州刺史。李弼傳。李暉總管梁洋等十州諸軍事。梁州刺史。李儼總管延綏丹三州諸軍事。延州刺史。尉遲綱傳。除涇州總管五州十一防諸軍事。涇州刺史。又爲陝州總管。七州十三防諸軍事。陝州刺史。侯莫陳瓊傳。遷金州總管六州諸軍事。金州刺史。轉荊州總管十四州八防諸軍事。荊州刺史。據此。則止改都督爲總管。而其職任不異。本紀但云某州總管者。止以所治之州冠於總管之上。以取簡便。非當日結銜之本然也。隋有揚并益荆四大總管。又有諸總管。皆以某州總管爲名。似與周異。然考隋書。秦王俊傳云。揚州總管四十四州諸軍事。并州總管二十四州軍事。蜀王秀傳云。益州刺史。總管二十四州諸軍事。皇甫績傳云。信州總管十二州諸軍事。則仍與周同。但史家例書某州總管。惟列傳偶一見之耳。大昕按。北史於總管結銜。亦有全書者。長孫儉傳。授總管荆襄

等五十二州諸軍事、行荊州刺史、轉陝州總管七州諸軍事、陝州刺史、李弼傳、出爲總管延綏丹三州諸軍事、延州刺史、侯莫陳穎傳、拜桂州總管十七州諸軍事、王謙傳、授益州總管十八州諸軍事、權景宣傳、授荊州刺史、總管十七州諸軍事、尉遲迴傳、除秦州總管秦渭等十四州諸軍事、韋孝寬傳、除徐兗等十一州十五鎮諸軍事、徐州總管、崔彥穆傳、拜安州刺史、總管十二州諸軍事、又除金州刺史、總管七州諸軍事、又爲襄州刺史、總管六州諸軍事、令狐熙傳、拜桂州總管十七州諸軍事、王慶傳、總管汾石二州五鎮諸軍事、汾州刺史是也、但其時設州既多、加以鎮防名色紛繁、不能如晉宋諸書之例、史家競趨簡易、約舉數州、後之考地理者、仍無從舉其名目耳、唐時諸州都督結銜、猶依舊式、如尉遲敬德碑云、授襄都鄧浙唐五州都督、襄州刺史、贈使持節、都督并蔚嵐代等四州諸軍事、并州刺史、王湛碑云、贈使持節、都督瀘榮漆珍四州諸軍事、瀘州刺史、楊志本碑云、除都督潭衡等七州諸軍事、潭州刺史、皆其明證、而史家省文、祇書某州都督而已、

隋本紀上

文帝、魏初爲武川鎮司馬、因家於神武、樹頽焉、樹頽、縣名、屬神武郡、魏書地形志作殊頽、蓋避高歡父諱、

以東魏之逼、與信俱歸、紀不書并梁事、史臣諱之、

以隋州之崇業、鄖州之安陸、城陽、溫州之宜人、應州之平靖、上明、順州之淮南、士州之永川、昌州之廣昌、安昌、申州之義陽、淮安、息州之新蔡、建安、豫州之汝南、臨穎、廣寧、初安、蔡州之蔡陽、郢州之漢東、二十郡爲隋國。按鄖州之名不見於隋志。據隋志安陸、城陽二郡皆屬安州。則鄖州卽安州矣。崇業、宜人、永川、建安四郡隋志皆無之。士州志作士州。未知孰是。

開皇六年山南荆浙七州水。浙當作浙。周隋置浙州於浙陽。卽後魏析州也。浙非州名。此轉寫之譌。十八年杞宋陳亳曹戴穎等州水。戴州卽濟陰之成武縣。開皇十六年置州。

隋本紀下

煬帝王懋竑曰。此紀全是隋書之文。略無增減。詔令載於南北史者。較本書不過什之二三。獨此紀皆載全文。大業八年征遼。詔千有餘言。亦備載不遺一字。疑北史闕此卷。後人以隋書補之耳。北史本紀例稱帝。此篇獨稱上。亦一證也。大昕按北史紀傳後皆有

后妃傳上

三嬪視三卿。六嬪視六卿。世婦視中大夫。按靈太后初入掖庭。爲承華世婦。旣誕明帝。進爲充華嬪。明帝充華潘氏。亦稱潘嬪。是嬪與世婦皆別有嘉名。史家不能悉舉耳。

魏文成皇后馮氏。父朗。秦雍二州刺史。西城郡公。外戚傳作遼西郡公。

太后立文宣王廟於長安。按外戚傳馮朗追贈燕宣王立廟長安文宣當爲燕宣之譌。故紀道德王遇張祐苻承祖等。紀道德卽抱嶷也。恩幸傳嶷字道德其先姓杞。文成皇后李氏梁國蒙縣人。李崇傳作頓邱人頓邱蓋其族望而家於蒙縣也。母頓邱王峻之妹也。母字衍。

宣武靈皇后胡氏。時太后逼幸清河王懌。按元又傳言懌以親賢輔政每欲黜又遂令通直郎宋維告司染都尉韓文殊欲謀逆立懌懌坐禁止後窮案無實又恐懌終爲己害乃與侍中劉騰密謀詐言懌貨中黃門胡度等金帛令以毒藥置御食中以害帝帝信之初不言太后逼幸事清河王懌傳亦言元又恃寵驕盈懌每抑黜之又黨人希旨告懌謀反禁懌門下訊問左右得釋焉正光元年又與劉騰逼孝明於顯陽殿閉靈太后於後宮囚懌於門下省懌罪伏遂害之亦不言宮壺事然則逼幸清河一節乃元又輩誣讎之辭未可信爲實然也。

文帝后乙弗氏。高祖莫瓌擁部落入附拜定州刺史封西平公。莫瓌卽乙瓌也已見列傳十三卷三世尚公主封號俱於彼傳詳見之此云莫瓌拜定州刺史而彼傳不書蓋西魏四后皆魏收書所無延壽別采它書增益之故前後不相檢照并不悟莫瓌與瓌之卽一人也。

齊武明皇后婁氏。及茹茹公主至。后避正室處之。茹茹與蠕蠕音本相似。然北史紀傳諸篇皆依魏收書作蠕蠕。無有作茹茹者。惟后妃傳序例云。神武所聘茹茹女。稱茹茹公主。此篇亦有茹茹公主之文。而上文卽云神武逼于蠕蠕。欲娶其女。此後仍書蠕蠕公主。一卷之中。不相檢照如此。難免後人之指摘矣。

周文皇后元氏。魏孝武之妹也。初封平原公主。按魏本紀。孝武從妹不嫁者三。一曰平原公主明月。

南陽王同產也。是同時有兩平原公主矣。張瓊傳作平陽公主。

宣華夫人陳氏。容華夫人蔡氏。按前卷序隋文置三夫人。九嬪之名。無云宣華。容華者。

魏諸宗室傳

宜都王日辰。乙渾謀亂。日辰順陽公謀殺之。順陽上當有與字。

華山王鷲。咸陽王坦謂鷲曰。孔雀老武官。何因得王。鷲答曰。斬反人元禧首。是以得之。按鷲封王在

孝莊時。距咸陽王禧之誅。已二十八年矣。本傳及禧傳俱不載斬禧事。恐未可信。魏書此卷已亡。卽

用北史補之。疑此延壽所增。非魏書本文。

子思。尋魏書崔琰傳。晉文陽。傅嘏傳皆云。旣爲中丞。百寮震悚。按三國志崔琰傳。嘏二傳。竝不云爲

御史中丞。晉文陽或疑晉陽秋之譌。然嘏魏人。非晉人也。

昭成皇帝九子。庶長曰寔君。次曰明元帝。明元當作獻明。

禎。後拜南豫州刺史。南豫州治懸瓠城。魏書地形志但稱豫州。無南字。

素。休屠郁原等叛。素討之。斬渠。率徙千餘家於涿鹿之陽。立平原郡以處之。此平原郡在幽州界內。

魏收志失載。

可悉陵。沮渠茂虔令一驍將與陵相擊。茂虔紀傳皆作牧犍。牧茂聲之轉。犍虔音同。

紹。宣武詔令檢趙修獄。以修佞幸。因此遂加杖罰。令其致死。按趙修傳不見元紹姓名。

壽興。洛陽男子。姓元。名景。按壽興名景。不見於史。當由名犯唐諱。故書其字。此銘作韻語。不可稱字。

乃以景代之耳。

嶷。斷嶷要而出。要下有闕文。當是要帶之類。魏書此篇亡。後人取北史補之。要字下注闕。

淑。秦州河東。杼柚代春。按魏初置秦州於河東。故有秦州河東之謠。監本秦作秦。蓋據魏書地形志。

校改。然其時自有秦州。治天水。不應同時有兩秦州。當以秦爲正。

道武七王傳

江陽王繼。大都督。節度西道諸軍事。據此。則節度之名。元魏已有之。不始於唐也。

太武五王傳

廣陽王深。深本名淵。唐人避諱追改。北史列傳中鄧彥海侯深張深皆名淵。或改爲深。或稱其字。

景穆十二王傳下

東阿公順。僕射李思冲尙與王洛誠同傳。以此度之。卿亦應繼其卷下。按元順所舉。當是魏書舊本。

崔鴻諸人所修。今魏收史列王叡於恩倖。而李冲別爲傳。不如舊史臣之直筆矣。

文成武王傳

安樂王長樂。皇興四年。封建昌王。此事本紀失書。

鑿。斬首傳洛。詔改姓元氏。莊帝初。許復本族。按元爲國姓。鑿以謀反絕其屬籍。不當仍姓元氏。魏書

云改其元氏似爲得之。

獻文六王傳

廣陵王羽。今解卿長兼。可光祿大夫。守尙書。按長兼與守皆非正授之名。據此傳。于果以長兼尙書

降爲守尙書。則守下於長兼一等矣。

廣陵王欣。恭帝初。遷大丞相薨。魏本紀不載此事。且是時宇文泰擅權。未必以大丞相之名假人。恐

不可信。

彭城王勰。嫡子劼。字子訥。襲封。按勰第三子子攸。封長樂王。卽孝莊帝也。子攸弟子正。封始平王。於

河陰遇害。又孝莊兄子小字伽邪，封陳留王，傳皆失書。

劭子韶，襲封彭城王。按：韶弟襲，武定元年封武安王，傳亦失書。

大誅元氏，自昭成已下，竝無遺焉。按：元文遙、元景安俱昭成之後，賜姓高氏。元蠻、道武之後，以女嫁孝昭，苦請得免，賜姓步孤氏。又元士將，昭成之後，武成時，官將作大匠。元景皓亦昭成之後，以不肯改姓，誅家屬徙彭城，則其時仍有漏網者矣。此傳云前後死者七百二十一人，當得其實。齊本紀云殺三千人，恐史家已甚之詞。

北海王詳，妃宋王劉昶女。按：咸陽王禧傳，詳聘吏部郎中滎陽鄭懿女。

孝文六王傳，孝文諸子。京兆王愉之子爲西魏文帝，廣平王懷之子爲孝武帝，清河王懌之孫爲孝靜帝，而篇中皆不見其名，知此卷文字脫漏多矣。

京兆王愉，孝武初爲護軍將軍，孝武當作宣武。

於是孝武攝愉禁中，孝武當作宣武。

孝武詔尙書李平討愉，孝武當作宣武。

後靈太后令愉之四子皆附屬籍，追封愉臨洮王，寶月乃改葬父母，追服三年。愉四子，其一爲臨洮王寶暉，其一爲南陽王寶炬，其一當是寶月，其一不可考矣。寶月上當有脫文。

清河王懌。孝武初拜侍中。孝武當作宣武。

又言於孝武曰。孝武當作宣武。

孝武笑而不應。孝武當作宣武。

聞懌之喪。爲之慟。面者數百人。按本紀。正光四年。追封懌爲范陽王。尋復爲河間王。其子竇嗣封清河。史不著其年月。大約在孝莊朝也。普泰元年。以竇爲太傅。永熙元年。爲司徒。孝武西遷。齊神武推竇爲大司馬。承制行事。未幾立竇子善見爲帝。卽孝靜帝也。天平三年。竇薨。興和二年。封皇兄景植爲宜陽王。皇弟威爲清河王。謙爲潁川王。皆懌孫也。

廣平王懷。闕。此傳全篇已亡。僅存三十二字。不知所謂。考本紀。懷以太和二十一年封。明帝卽位。由驃騎大將軍進司空。遷太保。領司徒。熙平二年薨。孝昌二年。封懷長子誨爲范陽王。官至左僕射。爲余朱兆所殺。文帝大統中有廣平王贊。疑亦懷之子。

汝南王悅。此篇亦多脫文。悅以景明四年封。熙平二年。爲儀同三司。坐殺人免官。皆不書。此闕漏之顯然者。

悅乃爲大判碓。置於州門。此悅都督徐州時事。其上又有脫文。

孝武以廣陵頗有德望。以悅屬尊地近。內懷畏忌。故前後害之。廣陵謂節閔帝也。廣陵安定。東海皆嘗

登大位。悅亦爲梁所立。故孝武忌而害之。豈以其德望及屬尊故邪。東海安定於屬本疏。又無德望。何亦死於非命。史所言失其實矣。